

10 T 5422 / 3263

~~5422/3263~~

玉
菴
堂

玉茗堂全集序

臨川先生，應廬岳之雷鈴

骨濯紅泉之靈灑，遊清高厲

少振發乎純英，醅醴玄齋，搃

味滋於氣，毋極命草木，揆採

哈佛大學哈佛葉京
圖書館珍藏印

苞符苞鮑參軍霍蒼文場充資
健翻陸平原龍驚凡夢海不假
崩雲既體會夫風騷自妙諧
夫鍾律三都誠麗猶徵夏熟
於上林九辨已闕骨潤春發於

下里觀其史玄並作雅交不拘
貫珠編貝以扶光觸石隨山而
注委砢砢相獵之威頽眇駁
安之雄歎亦擲地為鏘雕章
成虞矣若乃通諸國體刺達樞

宜屬初興事之有端覈實契
本之多致直氣無包乎古義
峻標六削於儒箴故能仁愛智
與足言足志欽還奔放解釋
幸拘由以觀以證一匡即十難而

淹七略含今古之制扣宮徵之
聲藻火紛披不闕補綴車
攻徒御豈失馳驅匪借名法以
申言雖肆滑稽而皆道時
復金枳度雁出茗流鶯向園

為藥之花思掛葡萄之樹咲
司電女適報曉投淚滴泉姬
微看珠暈莫不接近張祐橋
記孝慕忽從聾一俗狂醒之
中醒以齋多枕清冰之法萬存

說偈一二寓言要以源接肝江
驅百川而入海席分紫柏起
三乘以安禪故覃思不數王
何而機捷每先曹洞晝夜齋
視暄涼等情閱世觀生守惟知


白陵祠蕭淡忘興嘆於北門瘴
嶺流離及寄懷於南郭
貴
生院裡亥鳩舌為好音君子亭
前植蒿蓬為美箭歸來柳
色依然槐棘春風老古香夜

更嘉彌班朝嘉迨孺慕極於
死孝而得全不失達生相
騎
拋蝶以飛朗還星辰之位重
象可作九派難追輟介慟於莊
生聞笛哀如向氏惟幸音徽如

在紉復縑素頻通靡安吉光之
裘片羽六秘飢渴經綰之襲連
城未償猶子於茲頗希夙好
逖披也採短什長行勒成琬
琰之章庶復雅頌之所猶頌

羽陵小商之策盡出人間將以
山木澧蘭之思生諸公子務使
經緯昭回光岳肆奠豈止懸
金秦布刻石漢京是非未定
於陳王離合猶傷於平叔哉

天啓改元清和朔旦吳興後
學韓敬謹纂



上茗堂賦集目次

卷之一

和尊言賦

庭中有異竹賦

有序

療鶴賦

有序

百仙圖賦壽郭年伯

相奎父

池上四時圖賦

有序

匡山館賦爲友人豫章胡孟弢作

有序

銅馬湖賦爲友人金壇鄧伯羔作

愁霖賦

懷人賦 有序

吏部棲鳳亭賦 有序

哀黃生賦 有序

卷之二

遊羅浮山賦 有序

秦淮可遊賦 有序

青雪樓賦 有序

西音賦 有序

嗤彪賦 有序

卷之三

大司馬新城王公祖德賦 有序

感宦籍賦 有序
竒喜賦 有序

卷之四

四靈山賦 有序
霞美山賦 有序

浮梁縣新作講堂賦 有序

卷之五

懷恩念賦 有序
高致賦 有序

酬心賦

有序

哀偉朋賦

有序

卷之六

豫章攬秀樓賦

有序

玉茗堂賦集目次

終

玉茗堂全集

臨川義仍湯顯祖著

賦

和尊言賦

靈仰方中提翔上宮燦承孟閏矯搨南雍問我
何思思我慈翁昨得翁言提勗玄風翁曰告汝
民之初生空遊莫圉夏子姬嬴繩生知謂多知

鈕年自絕遙舉汝生有辰厥命在旅劉歷扈翫
不惡寒暑爲汝駘蕩不相齟齬胎橐綿息絕屬
微許營載不密馳觴樂女迷惑兩豎醜不可語
謹牽龍轅孰霄汝醕調伏雀味誰迫汝處微言
邈視復息其所平冲廣行少取多與可以長壽
視天倚杵寧云波世遂絕敦固在儒爲聖在墨
爲巨曾是不居但費行糈兒跪受教聳汗若雨

有生之生衆父之父兒非堯孔又乏彭聃無量
無方不得雙湛禹疏舜女由絕夏南嚴規易守
要妙難探尊有成命天無戲談世目同諦何止
得三

庭中有異竹賦

有序

大學東廂向南君子亭兩偏皆竹面闌干外
小方池池外砌植紫牡丹白芍藥數株中有

一竹亭然砌上旁無附枝闌干之內側生一
竹諸生疑此竹且穿簷而出當刮去大宗師
戴公不許此竹竟從橫闌稍曲而上不礙也
公嘆曰誰謂子無知矣授筆湯生立賦此兩

竹

大學之英君子之亭度靈臺而選勝繞聖林而
啟扁麗園橋之壁藻薦方沼之文萍被素風以

德衍承翠氣之葱菁魚相忘於在沚鳥載翫於
高冥非游塵之所筮實君子之攸寧朱絃在御
玉磬懸庭緒休閒於鼓篋肆靜謐以橫經采齊
而步其視呻畢靡亂其聽色載笑而嘉則張一
弛以遺形釋纒綸乎几席縱流蒞于軒櫺幄垂
雲之曼葦帶積石之遙町練粉飄而莫莫玄池
韻以泠泠何修叢之葺靄儼雙篠之伶俦在籊

籠而矯雋信空虛之有靈顧湯生而命進授淇
園之筆精對橫簪以迤羨立函丈以經營池上
方臺雜卉羣栽丹華皎砌素藥翻堦孰亭亭而
異觀照瀾瀾之檀欒挺碧鮮而上峙擢岩嶷之
翠竿復有宇下盤桓庭中偃蹇衆疑萃於孤高
謂妨檐而欲剪竟自出以委蛇挹清池而迴展
翫此籀之生成象至人之舒卷爾其爲狀也虛

中忌實疎節簡密臨流似淵依巖類逸貞儷乎
淑美之操直比乎君子之筆影防露以嬋娟響
應律而蕭瑟茲篔簹之一態未若夏標而巧出
乃其芳根獨遠一筵玄通絕左右之葳蕤貫青
熒而在中匪臨深而表勁緊濬子以明冲豈太
山之荏苒似高岡之梧桐若其迸石而立磬折
偃僂下不礙於憑軒上不虧乎承宇羗有心乎

雲步乍低迴而矯舉貴托根以自全異當門之
鋤去故孤生者常直近人者常曲直有取於明
心曲亦時而衛足明心靡遐衛足匪他一鸞一
鳳一龍一蛇自歌自舞或屈或伸君子儀之素
體圓神左右貞風學士如林敬吟藁竹遑嗣青

衿

療鶴賦

有序

大司徒王公北海樂亭人也聖亦如愚貴能
存賤頰聞浮譽先移長者之車仰謝光塵卽
倒王公之屣見其公子本藍田之玉艷示以
著述兼冊府之璆綴披讀其中有療鶴一記
司徒公從御史遷大理時也途邁被創之鶴
哀鳴馬首軒而療之長翼盈肌終不復去表
君子之流慈偉仙禽之善托抽筆敬賦

夫何一皓麗之仙禽兮孕海隅之奇氣鼓壺喬
之清夷表頽玄而間藻逞丹素以明姿趾象虬
而振步形亞鳳以揚儀吐奇聲而嚶徹駕雲蹤
其委蛇薄幽林而不處颺平圃以高睨豈垂吭
於貴粒將毳毳於昆池崇紅閒之離繳璣玉態
以披離至乃華表摧雲蘭巖墮雪膺散紫胎之
毛臆染蒐戎之血月羽全虧霜翎乍折落萬仞

以遙驚逗千翎而橫絕歛桂籍之來遊會蒲且
之見掇遂乃延頸伏地長鳴振天向流風而若
訴庶歸仁兮自全厥有碣石真仙孤竹名賢儷
寶慈於柱史邁種德之庭堅霽霜稜于繡斧吹
暖律於盧船在雲屯而叩拯迺震解以流蠲公
府之驄且止神臯之禽可憐遂乃駐此游龍收
其病鶴類秦樹之驚鳥似雕陵之感鵠縱置文

園留陪金閣擬儁格以難攄遲誼寰而眷托謝
冲天之騏驥就投人之燕雀閱其半死半生借
以一丘一壑飲以流丹之泉傳以良金之藥俛
仰願神行遊顧樂弱骨重堅殷痕再合嬉同神
王之翬怖異禪林之鴿戲葳蕤之瑣墀對蕤蕤
之華榻爾乃素月蟾流清風螢亂繡箔催蛩關
河別鴈滴塗露以涼年耿微霜而夜半單隻誰

儔逍遙無患聽遠唳於層霄聳素心於遙漢至
若西北十五東南二八霞肆羣翔雲天永曼或
取仙人之箭或寄西王之札動清叫於園方寄
奔想乎垓北豈疎肉之難飛詎淺毳其如鍛低
昂欲翥徘徊至曙憶虞人於藻田奉君子於蘭
署非戀日以余羈寔秉心之維恕念酬環其莫
展欲銜珠而未之希淇上之軒未羨緱山之

御願終惠於階屏永畢生今容豫

百仙圖賦壽郭年伯相奎父

南極一星西真百人靈儀飲日正氣生神年齊
一指人過六身黃絹寫照素領籠巾嶺岈杼首
緬邈微頤松子遊漢桃花去秦桃結千年之寔
松披萬歲之鱗蒲茸石上珊瑚海濱露晞紅燥
烟開翠勻俱邀皓侶並戲玄津則有乘緌扑鶴

託李馴麋奕則樵人之斧博則井公之碁了忘
懷於勝負或試守於雄雌復是仙林結響比竹
調吹琵琶出峽琴歌湧湄彼輕宮兮穆羽庶調
鳳以鳴螭別有金根紫腦繡軸紺筆揆空青
之秀箋標小碧之竒南軒並檢西極同窺坐寫
三皇之誥行書八會之詩若乃芙蓉半幘杜蘅
全披俯癭槐而叩肯策靈杖以支頤載色載笑

或前或隨棄雜縣之廣樂謝迷陽於履綦剔耳
兮綴宅之高窻不掩晞髮兮明堂之華葉無虧
翔風窈窕曳景逶迤亦復遊波紫源采琳玄殿
月鼎裁圓霞火初扇雀舞蛇遊龍吟豹戰文武
閑調陽陰顧戀黃金丹兮半圭紅玉粉兮一片
一片兮丹田九轉兮洞天歸昌兮何與人事入
鼎兮空聞代傳出函關兮何嘆留漢庭兮未旋

辯葡萄兮進酒援桂枝兮往篇並榮塵兮不免
非玄通之固然何如列真之圃象帝之筵龍花
對飼螢芝并燃雲子風寔樾都藻川偕揚妙氣
寧知大年山中兮若有環中兮又玄詎貞脆之
殊采信語嘿以平筌欽風久矣圖雲爛然是用
寫東華之百老寄西昌之一仙

池上四時圖賦

有序

南安孫子樂予同年友也構精館於周池之
中成臺之上極山水之致焉繁植芊綿遊鳥
嘲吹孫生體素懷冲覽聽流玩不能離去自
號印池居士屬者應詔迫而就道則緗囊錦
腦寫其八節之歡時而展之何必千里也騷
人墨客爭就其圖臨恂焉余爲賦之

橫浦新波章都舊河東榮曙浦西華翠多藻魚
城之澹淡輝鰲閣之嵯峩途稀雜駟里息塵珂
蘊醴風而遂僻漾空景以逶迤有美一人在江
之沱本豫章之才子擢明光之桂柯染玄津而
激泳涉芳苑以婆娑選崇軒於一阜緬周池乎
四阿橫披睡柳倒插舒荷葱蘢翠竿班駁文莎
草香蝶舞花明鳥歌池上兮酌酒庭中兮載過
肴參桂蠹觴飛樹螺麗青雲而燦錦皺綠水以

縈羅上客未散美人半酡步窈窕之環徑藉芊
綿之繡坡含情久矣撫景云何若乃殘春告謝
入夏清和蓮葉遊蔡香樹眠蛾濯芙渠而嗅葍
飲石溜以蒙蘿又如清飈蟲亂素漢霓拖霜鳴
石鴈露攪金蛾葉微波而聽鶴月安臺而影娥
至若嚴冬兮積雪千里兮皓潔梅樹之關直開
玉枕之雲橫絕蘭夜興以猶乘蕙曉寒而詎輟

恣池主之遊棕並山陵之所設尊生子聞而嗜
之曰有是哉孫生之宗代不闕材昔公和雲嘯
於蘇門興公霞眷於天台俱耽閟域並穢塵涯
未有卽人寰而遣適緣物務以遊懷今孫生以
方丈爲丘不離桑梓隔尋常之水卽是蓬萊先
大夫絃歌而資柳徑大夫人戴勝而處瑤臺婦
則蘭儀在室子則芝種盈堦可以晤言游泳永

謝推排乃復縻情好爵駐象璇台類三山而不
處涉萬里以頻來遵楊生之岐路失祁氏之山
崖將無垂卧遊之致取逋客之移館則孫公之
館池非樊父之池已焉哉莫往莫來山中之人
可猜或嘿或語人間之世如許且植援於山庭
重係迹于丹青印清池而鑑止終賞泌於竒齡

匡山館賦爲友人豫章胡孟弢作

有序

孟弢本豫章之才子慕匡山之舊廬結架山
顏逶迤雲貌每聚遠公之笑自號栗里之人
白雪恒操玄風再鳴余嘉其志包宇宙爲賦
所居

美澤國之洪州奠江陽之名嶽柱北斗以崔巍
鎮南條之廣邈爾其日月影射烟波沃漾積霧
沈峯橫雲矯嶂碎瀑珠寒香鑪翠颺竹影之金

書自然樹杪之缺船無恙物死強梁人生弱喪
空迷閱水之中不住靈山之上如何孟叟先我
遊遨眉顏如畫意氣真豪河山不礙風雲自高
書盈唐述賦滿邊棹鵜峯比峭鵠岸雙遙發匡
后之寶牒覓吳嶝之金膏見白龍之時起聽玄
豹之潛號搏空屏而曉灑寫石鏡於寒臯升降
神阡吐納靈川林冥冥兮欲雨人飄飄兮似仙

仙家兮遊衍層陰兮疊巘覽神丘而弗居孰人
寰其更選借禪林之一丘構丹房於九轉逗驟
鸞於石梁尋飛鷲與敝編天門之松側生華嶠
之蓮半卷况復岩流自清藥樹恒榮留半空之
霜雪隔浮世之陰晴長風夜作則萬流俱響曉
鼙晨嘯則百嶺齊應朝飢則平湖上菓暝暗則
彌山佛燈允可以頓真人之響策儷神區之赤

城乃有辯才大士玄德先生遡襟靈之滌覽泛
馨香而解縈妙吉對揚之地高真玄憇之楹振
林木以長嘯憶蓮花之舊盟出淺見而遊戲捫
重玄而迅征方遺蛻乎生品又何流鷺於塵情

銅馬湖賦爲友人金壇鄧伯羔作

若有人兮鄧林懷悠悠兮子衿臥仙壇於谷口
封天湖之水心谷口兮流眺水心兮殘照山中

人兮何之去滄波兮獨釣若乃春風不寒春流
正寬紅鱗試子綠草迷芊攬芳洲兮杜若倚垂
楊之釣竿及夫文萍旣合珠荷未卷麥雨飛來
蘭風溜轉苔磯之迹全蕪竹嶼之絲半展至如
白露霞明綠淑風清肥魚正美石鴈裁鳴靡芳
桂以爲餌泝薰葭之盈盈况復素雪紛飄玄池
寂寥皓明湖其未凍詎幽山兮見招漱寒流而

隊繭聊卒歲以逍遙坐飛闌之曲碕步澄灣之
板橋眺魚臺於月夕移翠篠於霞朝玩沈精乎
在藻寧紛波乎市朝厥土王生長爲釣侶比目
雙抽文竿對舉鱸彼嘉魚陳其芳醕厭玄洲之
共學憇長楊而並語側微棹於歸風濯煩纓於
逝渚其釣維何載遊載歌歌曰水國波臣漁父
賢人蒼梧兮浙水黃河兮衛津並垂顧於巨獲

亦見巧於織綸玩芳湖之銅馬異昆明之石鱗
不羨來提之玉維澆去住之塵湖水連天亭間
釣船豫章之魚頃刻凌陽之鯉三年旣就淺兮
就深亦載浮兮載沉餌何爲兮魴旨釣何爲兮
香金鏡水中而容與莞澤畔之沉吟苟濠魚兮
可樂計相忘乎直針

愁霖賦

駛河北兮春深滯江南兮夏霖浩蒸氤而湧岫
漏飛風而擾林颯零零其晦隕瀾淒淒而晝沉
月夜夜而離畢霞朝朝而載陰始濛濛而徐墜
終漰沛而難禁苦紛射而下澍並流歎以沉吟
爾其神燁代仰谷風猶作麥穗辭膏花枝罷濯
琅瑯之稻栽舒房子之絲始絡愛凱薰之時拂
惡祁雲之併落遂使閨無塏做疇成潰壑室婦

歎而停機臺峻悲而廢罇在蟻封而有時占鳩
逐而無樂十旬不休五月披裘感寸膚之恒潤
觸長帶以頻浮奏比閭之接溜激四注之沿漚
奔泉直響積潦橫流騎輪斷迹鱗介來遊戶挺
竹竿之釣街乘桃葉之舟况復江臯漢田海曲
河孺播空濛之泱漭慘瀏漑以連綿長虹飛而
竟杳陰火濕而難然水氣黑而防驟風色亂而

忌前滂躍鱗之鬣鬣舞淋鷺之翩翩困涔涔之
穠雨濕裊裊之漁烟波光黯矣水客悽然篷輕
易瀝帆重難旋見衝霖之駭岸愁大浸之稽天
若乃神虬掛漢朱鷺浮一也西海龜出南淵
並取終朝之潤誰謹溽雨之偏至以路初馳
關河未稔絕國搖魂離亭悵飲謂挺轡于晴埃
忽霑霑於絕險又若陰鳥啼林陽鳥向崦後騎

難催前閨易掩覆笠雲來征袍雨點度谷雷懸
攀巖電閃橋道斷絕泥途積染何旅緒之搖搖
嘆年途之冉冉至若載陽載陰倏啼倏笑北斗
潛輝東皇隱照巷絕來遊門希久要水鳥翔其
戶商羊生於穴寫崩山之絕絃斷凌雲之逸嘯
沒玄寂於蓬萊跟真空於藜藿詎知夫椒屋驕
奢梓澤妍華客淋漓於公府賓沐櫛於侯家誰

惜王家之鄣誰借孫弘之車蔭幘幪于夏宇等
晴麗于春霞灑階綦之薄蘇雷檐桐之暗華遂
乃置酒飛閣疊坐崇樓覩朝濟而不歎指暮雨
而淹留雖復金鋪繡澀玉鳥津流素屋有昏頽
之苦紅氍無底滯之憂爾乃室乏瓶儲家徒壁
立土復繩樞上漏下濕丹釜遊魚顏瓢斷粒固
宜其寂寥無賞淪埋類螿走獸爲之號咷飛禽

爲之翕戢子桑餓而未死子輿悲而載集卜子
之蓋遙馳郭氏之中屢浥褻飯而趨排榛而入
徒聞其且絃且誦如歌如泣怪其情生嬾其調
急悲情生兮匪他問傾天兮謂何對升雲之龍
蒼畏淪液之滂沱玄黃漫其無質陽陰溼而未
和蕪漸洳之蔓草泫飄零之桂柯匡棗一鼓愁
霖再歌歌曰父耶母耶原覆顧之周遮天平人

乎寧燥濕之偏枯晏雨何心委運因任隨飄隨
止孰勸孰淫本萬物之爲芻紛人生兮若林有
情者分其濡爽無心者一其霽沉且棲遲而撫
化又何慘積于愁霖

懷人賦

有序

懷樂安令沈公蕪也蕪美須顏有烟霞之致
移令樂安彷彿王喬之在鄴竇子明之化陵

陽也入朝左遷于楚余亦下第過余咄曰義
無不釋乎以子之姿太清太寧之氣也豫章
廬山遠有匡俗近有顛張遠有徐孺子近有
吳聘君高者鸞鷲天庭低者鵲起人世紛紛
偕計射策銷其年力珠彈玉抵君何取焉余
時擁臥未荅眷其知已絕人矣歸南都中伏
夜不能寐起坐月露之中披懷作賦

悲夫天大地小飄其淳光日往月來流其迅景
運密徙以疇覺物昭徂而遞警戢升淪于半氣
覽衰隆于俄頃孰無懷而不傷在有情而必整
雖美人兮滿堂兢勸余之修騁慚御世之無竒
彙深流而縮綆趾鄧林而必枯詎冥山而見郢
內熱愁焦長途畏影儻躋驚於青齡復遲徊于
素領俟河清而海塵幾竟銷兮骨冷故知死之

徒而欲生躁有君而用靜想盡者窮年觀冲者
忘境羨往去之松喬識向來之箕穎務尊養以
斲全疾銷聲而自屏佳哉沈生海內廉貞德有
魯鱗之實政留蒲密之聲余方榻迹於公府沈
亦垂翅於黔荆旣同病而同歎亦有胸而有情
謂余姿之淑遠似扶輿之瀨清旣在人而靡類
亦何慕而不成曷不都捐赤臭之路了涉清芬

之程有豫章之丹釜有廬阜之金英釋恬愉於
性智一昭昧於竟營證無生以爲友拂頰驅而
頓輕止則風停動則雲征鬱兮纒鴈之聘飄兮
素鶴之迎豈不長消枝係永辭患驚爾乃效藩
羊之靡決類纏蠶之自縈送華韶于遠道爍靈
根于短名已焉哉言之者無猜聽之者有懷經
物情兮轉流泊生人世兮苦難諧索米長安之

舍忝馬章臺之街豈若仙衢玄仗帝圃清齋金
蘭之語無別棊尊之趣當垂鵠態雲霞之氣龍
章土木之骸結遙情于荆越托遊真於海淮君
門萬里人天一涯懷端易繞意藹難排西湖畫
艇南都紫臺窻高月度幔卷風來緬青衿而送
抱撫零露以傾壘每憶霏霏之妙語恒慚負負
於仙才

吏部棲鳳亭小賦

有序

余生有涯物遇無極隨畛而流薄觸象而透
遲固有年日矣若乃南都選署餘姚沈君俞
君磁州李君潮陽周君吳顧君王君余鄉朱
君俱懷當世之才逸俗之度余並遊之其署
南側有棲鳳小亭諸君緩頰之場也余醉其
中忽憶紅泉別墅草樹如斯因爲此賦

遊龍巨川棲鳳名園蘋池蔽景竹町籠暄吹臺
之梧對植暗河之桂雙掀果多梅萸草則蘭蓀
錦雲披而花笑珠露零而葉翻地則銓流之署
人非華競之軒况復選部羣公藺要清通並挺
瑤山之幹俱韻竹林之風賞心惟會鏡影彌空
緩帶而臨清燕擗管而和雕蟲可以永慶朝倫
之穆均歡臣譽之融汰靈襟於草陌送柔抱於

花叢芳尊之友無恙折揚之調誰工有如僕者
周行有命孔德無容雖煥發於霞藻終睇緬於
雲松也

哀黃生賦

有序

余友黃生名棟里人也年六十矣貌寢孤貧
聞遊者談京都之富冒漲而行止之不得至
徐州中暑橫鼻過東平已不任視聽矣至京

一日而瞑同旅人共瘞之關南余感其生時
驩譟撫壠酸涕下第陸歸不能致彼故鄉先
賦逝言

哀哉黃生生年甚飲今日故人齧君幽寢欲不
吞聲嫌相嘲切欲不陳詞難相飲噎生貧好書
仰人眉睫定本巾箱亡書別篋蠹跡難憑蠅頭
自寫獻笑虞初涉畧蒼雅目不知書玉珮金車

讀書如此不及侏儒生故無子求方服食雖有
閒情曾無弱息不善爲容揭露喉齒掉臂而行
槃跚步履故無長志亦復短視忽慕豪華來觀
帝里 帝里云何昔我經過夏浸稽空江淮
沐河濤翻雪島旋轉雷渦曲折駭頓寧任風波
渡江而馳僦逐騾車焚輪疾堞牛馬之餘中目
疑齒蒙顏變軀懸發有程不得徐驅寒門暑路

鑠石峩冰羊腸巖險駮耳摧凌公無渡河余方
泣岐拔劍而去不若哺糜生時揮手語謝朋友
帝里豪華誰非白首土風便習豈問妍醜結
駟難期蹈隙時有余聞此言重相止勸凡今之
人年輕力健勁出如鎚巧入如線動止如風舉
舌如電若鬼若神潛形晦現如察如蛔食復轉
變承鬣嬉遊侯鯖穢羨生無技姣槃阿則便古

人有言貴不如賤白首華京非生侶儔號曰強
起名爲宦遊年高始壯漏盡何憂如生已矣宜
終首丘左思摘白揚雲逐貧人皆有憶我獨無
身蟣腸蠅鬚鼯腹鳧脰影必隨形力不敵命河
上郵亭別館橫經妻稱牧犢子字螟蛉希夷自
供怪魅無逢翻爲浪士忽翳雲蹤陰陽之食貧
病之容中暍徐邈遊鳧岱宗裸致于京不復省

人目直猶視舌橫難陳一宿而冥同旅悲嗔藁
瘞都南時服周身他鄉是客異鬼非隣已迷生
路寧識歸津千秋一寄萬里同塵夏夏獨冢遙
遙族親鳧飛渺茫過鳥號翔何當拍取還君故

鄉

夫星圖粵地引潮汐於玄紐日次周天

夜於陽陸然則南嶺之南北戶之北固以

玉茗堂全集

玉茗堂全集

臨川義仍湯顯祖著

賦

遊羅浮山賦

有序

夫星圖粵地引潮汐於玄紐日次周天晷晷
夜於陽陸然則南嶺之南北戶之北固以輿
象之所偏麗燭龍之所長寤矣而廬嶽天子

之障衡山祝融之嶮樞軸雖連於西極經絡
未窮於南紀高融奧博是在羅浮羅山上直
百粵之精旁羅赤溟之氣軒轅以降隆爲粵
嶽矣而浮山者是惟蓬萊神山浮自會稽靈
海斷鰲不足比其波蕩操蛇不足異其轉徙
蓋流睽絕橋佇眙分輿飛峰息壤神理自然
所悵鬱者名迹蕪藹采真莫續湧塔暗朝花

之影沉湖銷夜樂之音每與友人祁衍曾曾
人舊嘆恨其奇大有終焉之意而東官陵祀
升踐靡由辛卯冬十月始以出尉徐聞速令
尹崔子玉於南海遲文學翟從先於東莞柘
川墟履原隰宿朱明曜真之館候晴霏焉蓋
晦夕也詰朝朔微雨襲梅墟經石門聽泉於
葉大夫春及之廊阿明日觀大簾泉避雨廂

臚弔湛公於黃龍講堂道甚窄硤夜火青霞
洞中有湛公樓七楹仙鼠居之此盡下界三
矣明日起青霞至顛際觀日出爲中上六界
美人峰殊好袖如道人時時出雲其下千仞
葉大夫石館處也日始華露欲晞見城郭者
四五前立石雙如蛾翅豎又立石翥爲燕子
門一名彈子門爲美人障其前瞻餘峰也同

人不前獨往彌勝從數羽衣人芟蘊而上鳥
道二十餘里迴翔眩視草樹飛走光氣有異
非所經識意謂靈境阻鬱剗然一岡平曼修
婉名以子午正其昏朝登頓再舍圭陰未禺
遂躡飛雲凌日觀唯見香鑪一具白水一卮
祀羅浮君焉望天池以陽星沙而陰東連扶
津之藹西盡崦嵫之色靡不區封有畛路藐

無倪者矣可謂恢魁乎大觀淵綿其神致也
哉枕石起臥欣言賦之儼於謝靈運想似浮
寫差爲飛慙云爾

極廬衡之經首暉赤嶽於賁禺畧招搖之桂樹
望雲氣於蒼梧問津途於莞城釋泛舟於源壚
灑林霏之窈窕漠巖戶之紆徐晨光飛而首路
夕影流而載驅倒煙容於衿帶睇朱明於隙餘

磴環頽于莽蒼林織密以扶疎策孤征而晻影
鳥羣歸而沸呼傍靈池以涉趾歷迴梁而聳軀
鍾鼓鳴於林間香氣騰於路隅是爲帝軒轅之
所履神赤熛之所廬坐參正而披衣閱柳中而
定居何遷人之執掌得借一於冲虛靈想接而
心歡營宅清而寐除慨衣冠其委土想丹竈之
流珠問洗藥於真人發靈簫於聖姑守瑤光之

玉虎戴碧斗之銅魚恨天華之宮不存怨明月
之壇久蕪斷冥心其莫引翳神光其忽諸徒使
來粵都者走明珠於合浦浮毳衣於賈胡彼臯
壤與山林非天性其焉如將縱觀其窟宅恣風
雲之襲余若有人兮山中葉公逃其大夫瞰神
峰之宵緲感鮑女之來胥築清泠之妙館移家
室於真壺半九天而一息卷懸泉而自舒契蘭

溪之趙相咏明懷於彼姝悵峩峩眉之脉遠覺茅
山之氣殊諒仙人之藐矣居其堂而載盱度石
關之穹窿接新構之離婁泉淙淙而夜鳴雲英
英而晝敷清不可兮久留澹容與以踟躕山帶
氳而翠積水簾波而素紆營磐砥兮偃仰蹶葩
華兮噴嘘避雨翮蝶之洞睨梁天漢之虛彼增
城之湛子洵赤海之名儒匪淳耀其外麗有神

精而內攄吐經書以玄澹集龍鳳以娛娛若洙
泗之間閭儼夏屋之渠渠委樓觀於山精寄田
業於門徒聖無存而不妙凡有亡而必粗疑海
波之增減窺戶牖之有無蘊苦心其爲誰遡流
風而涕俱於是拂金沙今夜語蹉青霞今日發
逗威夷而宛轉望敦龐而缺軋澹孤青於氣表
漏陽華於空閣若崖隙於川渠錯瓊瓏於樓闕

雖道絕於登降亦臨觀其曲折緬增城其在茲
遙仙風而吸嶸俯龍門而直上有流光之影撇
激上界之精華照下方之明滅何峰容之偉奇
漾真人之秀烈偶儷石之前臨露參差而障列
如倚翹以斯冲似懸帆之次揭映神姬之出雲
羨朝暎而暮晰轉靈蝸而下視象寒津之漱齧
始神山其浮來自會稽而涌垵覽至今其草木

有東方之種別泯合際於羅丘度鐵橋而綴缺
豈華靈之遠擘非秦皇之近設抵半舍而泉分
宿煙炊而飯潔詫木末崔子玉之下來陰石罅
翟點蒼之困歇信絕地之行難豈中天而輿輟
定飄搖而整巾豫蹶跚而結襪頓金策之拳奇
步羽人之勃窣上登藟其若梯進孱顏其若闌
峭壁虛而溜浮積泐歆而苔滑寄掌股於窟陁

托跟趾乎肩櫛蓋起瑤池而躡飛雲周三十里
之靈樾象耕之所絕蹊雉樵之所迷術肆奇樹
之葱蘢并異卉兮冥密糾蒼凝而互陰碧鮮流
而競發固風霞之所藹藹亦丹青之所淫鬱有
一花而四照有五色而一節或建日而無影或
嵌空而有雪青珠冷風其欲亂珊瑚叢生而逾
活神麈倚其雍容仙鼉影而撒拂木客離筵而

似語山魃隱映而倏忽別有朝菌若雲夜芝如
月翠羽攢菁金粉浮馥曩得一而爲艷此成林
而不掇固靈境其常然嘆人生之覲絕謂林封
而徑窮忽岡巒之秀闊礙撐距而不前乃案衍
而條達曉發足於青霞午凌岡而載芟候鷄鳴
於上霄降茲巒而子未正子午之嘉名定昏曉
之相割念人間之急晷劣旋車而已瞥矧山行

一阻迂慮峰攢而影咽竟凌霄而未禺何鄧林
之蚤渴豈日氣之偏延非海陰之所遏遂徑庭
其造天極空窅而戴日屬湘嶷於壘確辨交廉
之隴埒眇蒨木於河林認扶棗於渤碣揆瓊州
而地矯引長星而天豁布盼蠻之芒芒衆每生
而忽忽偶旦宅以推排蹂山川與名物昔冥丘
而去燕今南池而徙越爲情多其苦悲亦心淺

而易悅塵影含而智虧年路深而意沒夜樂何
時而遇仙花首何因而禮佛忖凡情於聖真若
闕觀與窮髮將無始之趣未融令有終之相難
閱朱鳳沫而潭氛碧鷄殷而石裂覽異鳥其參
差意靈禽之彷彿宮觀歸而如在丘壑虛而豈
屈吾將洗浮氲於自然悟空明於一切朱陵之
花靡謝曜真之氣長結燁光景今夏不知乎天

之所窮靚凌兢兮吾以觀乎日之所出

秦淮可遊賦

有序

庚寅晚夏望夕風月朗清人氣蕭爽大儀伍
君命酒秦淮波上肅舲學宮弭柁乎斗門夷
猶中流急管起於別航名倡更於樂府襍謔
竒遙淹於丙夜同寅膳客郎兩顧君小儀蔡
君各極本量而止懽如也就中客郎興寄橫

發待予正陽門下坐流雲之碧階送淪霄之
素月醉言有清人之許離思多久客之懷歸
攬朝霞賦成夕秀云爾

若夫赤月加望林鍾應響火熒熒而向流晷遲
遲而欲往光拂鬱以延歎氣烝沉而失爽徒屏
隱於軒廊闕遊觀於蒼莽何慙穆於周行獲佳
期於漢廣樂我諸君秀而有文繚江閩之素氣

朗吳越之奇氛既自公而多暇在燕私而必聞
樓臺落日山川出雲木懷陰而靡景草含清而
向曛首英寮其薦酒指蘭舟而命羣命羣兮何
適望秦淮兮今夕拊文石之傾闌背學宮之廣
陌玉樹之長廊半陰金陵之倒影猶赤有所期
兮未來借彈碁而遲客減人從以輕舟弛冠裳
而露幘儼佳賓其已齊放寬波而試劇蔭紫蕪

與丹駁雜青林兮糾石蟬啾嘹其翳響烏差池
而卷翮晦陽魚之出遊豔波禽之浮拍思幕的
於芙蓉眷幽芬於蘭澤物有去而歡遲時有來
而怨迫曠皇都其未娛舍流光而更索恨計往
於尋常悟懷來於咫尺澹容與於清華蕩流連
乎空碧蘋風起而颯帷箭月浮而動席度江東
兮宵析嚴念漢西兮重闔隔汰水關而望迥限

斗門而意窄態紛紜其自親飲周流而未擇極
本量之推排盡觥籌之發摘蘭肴藉兮風色鮮
桂酒流兮月波液唳簫倡於隣舫接棹謳乎伎
籍吹激賞而彌亮唱延悽而屢繹諒不醉以無
歸豈有懷而未襞水光搖其琰組露氣涼其簪
綵滌滯慮於玄青玩回環於虛白下瀨疾而須
款歸塘順而再逆邁亭臺於浦裔睇臯巒乎樹

隙素光流兮雲石稠黛色深兮風煙積或樹古
而池平有朱門而盡帑釣渚何營漸臺誰闢吹
簫屠狗之孫鳴鍾販脂之役杳河漢於清懷盼
亭臯其可惜緬吳淮之百流斷秦餘之一洫擬
王氣以中沉亘皇明而上直若渭水之貫都象
明河之注極流美惡而匪鑑映井里其如織蔭
居人於倍市駐遊冶之百色牕姝榜女之夜咲

蘆人漁子之風食想閣道於何年悵籬門於此
域荷年運之清夷竊君子之光飾况山川兮夕
佳有才情兮誰匿諸君感此且飲且持小人承
之或鼓或罷或唱驚蟬落葉或歌飛鵲依枝去
清秋其幾何撫逝川其若斯清觴已矣良夜何
其散殘瀝於津人分餘桃於侍兒收沉驪而一
艤上前崖而載歌眷橫參之巴西嘆明星之不

遲咿啞咲語徊旋步馳或有辭而未去或有去
而不辭亦各極其致爾誠無噍於參差別有東
吳主客情源無竭偶先驅而北矯轉候予於南
闕步嶢嶢而遡風立交桓而送月望紫氣之冥
蒙坐玉街之瑩滑譚信州之積想喟玄都之素
謁已九涉於星霜詎雙凋於顏髮愴世路之悠
悠對旁人而咄咄愛予行之高奇許微文之清

越諒醉語其必誠豈寤言而可忽倏天鷄兮告
晨漾朝陽兮欲出意悠揚而就分興淋漓而未
畢車倉皇而造門燭熺微而晃室歸夜遊兮氣
清聽晨風兮思密雖映賞於兼葭尚畱驩於蟋
蟀

青雪樓賦

有序

四明戴公是萬曆庚辰歲予遊太學時師儒

祭酒也公容情俊遠談韻高奇於諸生中最
受風賞徂春涉秋究日餘夜公私之致兼窮
禮樂之歡無吝矣辛巳以失意江陵相致仕
里居而予亦跼伏江外徽音邈綿巳丑予徙
官南祠得公手書云前塋婦徐青山山自天
台來其前雪竇山來從四明相當也夾以公
棠建溪前以剡水橫合而東北靈海胥其窟

矣若乃關流扞門隨迎主賓金魚之阜玉鏡
之池玄武碧鷄之狀仙人文曲之星察其地
貌蓋亦他日歸真之宅也夫沒爲堂房生爲
樓觀考槃其中名以青雲四窓四明蒼翠如
織步吟徙倚甚以自適吾弟達者爲我賦之
以示後人予感而賦之

若夫越國君子翰林主人江海空明之氣風霞

秀上之神既有情而有望亦信美而且仁雖紛
吾之寡韻獲勝引於成均坐東堂而賦竹過西
池而采蘋圖史之觀入夜琴歌之醉兼旬人逗
機而無舊物賞氣而有新素風期於道業過洗
激於清塵加以東閣嫌猜南臺恚誤本生世之
難諧豈時人之法度念袞職其何補謝榮衢而
息驚卷仁義之壇場問風雲之徑路溫伯雪子

之畏人姑射仙人之飲露非息陰而取機且緣
生而發寤七尺之有難無一瞬之新易故苦山
川之陰入尚瑩臺之闊樹曙霞標其可驚布神
光乎赤城度星台而折彩閃鬱郁於徐青影玲
瓏之雪竇洞葩華兮四明左棠溪之溜莅右建
渚之葱縈織交流於翠剡歸榮光乎赤溟洞壑
宮商之響陵阿鳥獸之形象委宛以靈和氣參

差而淑清青岵之金魚活活雪峯之寶鏡熒熒
吾山有終焉之志斯丘懷可樂之情志有悲而
未陳情有驩其必薦映渠陌之通明掩林霏之
等蒨藹生香其發越縟流津而渙泫臯壤曩而
陰穠草樹花而晴絢適愴莽以忘懷撫高深而
滯眷矯樓臺而一目敞軒薨於四面納陰陽而
吐心出山河而入見東井通日月之華北斗飲

風霞之彥客至而棲雲讓席人去而生煙拂薦
徘徊晤語徙倚流眄近深心其自遠迫遺形而
故衍挹靈華於清府望仙人乎海縣想勝業之
悠綿限情期之涉踐相毫釐而密移恃神明其
未變一徃之致無還方寸之心有旋故通人之
遠旨妙死生於一線惟人生之去來像潮音之
出沒偶愜寄於山川又奚分其宅窟當生門而

近鬼逝多林而就佛襲光氣之流離藉陰暉之
隱鬱撫靈娟兮悲玉人先朝露兮掩金骨指同
穴以爲期念皎日以明發依松柏之明庭托粉
檟於靈越旣連理之在茲庶畫衾之無缺遲鳳
靡於金泉訂鸞訛於石闕渺同室之春秋凜便
房之歲月想霜露於容堂且醉歌乎林樾極平
生之眺聽冀遊覓之恍忽樓造天而敞高壙穿

泉而勃宰隔地脉之幾何謝人歡於倉卒玩傳
薪於竟指候滄棗於窮髮來未詮其所根去不
知其何物苟來去之無存自欣愁之可拂就臨
穴而何怵暫登樓而靡他善飛沉之暢悅佳草
木之猗那思美人兮瑤草蔭山鬼兮女蘿奉浮
生於尺畧懷佳期於寸波悲千秋其未弭懽一
日而已多唱蟋蟀於軒堂邈寤寐於陵阿寄流

光於夜宅欣蚤計於前和弭日月之合璧成樓
闕之崔峩溯甘露之鷄鳴聽洛水之虞歌達生
之能事已畢微躬之滯累伊何澹春華於曉署
颯秋光於夕河昔樹人兮桃李今懷仙兮芰荷
尚風雲其未已乘樓觀以經過還及美人之無
恙佇靈想於羲娥

西音賦 有序

周無懷與今侍御饒伯宗並予弱冠時友也
周君氣激虹霓心注時務其人雖短在乎儒
俠之間也中年好道世業凌夷遂乃骨立於
江潭神銷於路側則夫把手而悲撫心而贈
者交道之常人倫之槩也夫上困者不如井
養外睽者思其家居於是周卿興言晚計修
仲長休璉之樂焉於予有成言也賦而歸之

何無懷之老人紛平生之可念昔魁顛而美髯
亦眸清而骨峭肯問舍而問田曾學書而學劍
說西州之地牢講南吳之天塹窺流俗以愁眉
指英雄而自占饒君長而靡餘周卿短而亦瞻
何賦命之殊條逢竝飛而忽墊妻子死而神傷
衣食虧而意斂青瞳枯兮無光白髮生而少艷
稍遊涉以痿那數坐遷而涕欠望百年兮幾何

尚寸心其未玷絜才度於時人許十倍而寧僭
君素食以恒饑彼脂膏而未厭痛皮骨之空存
直年華之數儉且辟穀以無方豈長生之足驗
偶西笑以彈冠竟東征而解纜朱絲拂而烏舞
洞簫吹而魚瞰獨世路之無明屈夜珠於投暗
致旅人之瑣瑣坐予官之淡淡將送子以薄裝
復依人而轉颿山中之桂團團江上之楓湛湛

愁江上之清風吹故人之白首昨與予今成言
歸葺理其園畝曉傍樓而聽松學當門而種柳
間雉廩之苗麥襍鴈池之菱藕直春秋之羨辰
約遠近之妙友舟音多半日之挈青驢有數步
之忝乍迎門而一笑且入坐而開口問近况之
何如并遠親之在否墟集之屠鮮可具廬落之
果蔬自有眼前之風物宜人厨下之兒童應手

或興淺而中飯或談深而上酒有月下而聞笙
亦風前而擊缶常若斯其往來初不記其前後
倚名流其自清恃嬖跼而可久予素信乎周卿
諒斯言之不朽巧天機其密移劣人心之映受
愛世味而愁短立家基而願壽一生二而生三
歲數伏而數九糴清微而糴粗過美好而逢醜
猶守兔於舊株尚窺魚於敝筍豈知事有所不

可知器有所不可守嘆予官今久稽歸與子乎
解携遡流光之綽約映明真而卜棲過香鑪於
星子揖上清於盧溪散江湖之流精玩龍虎之
仙機水玲瓏於山岵花掩藹於林扉亦鷄犬之
相聞但車馬之來稀能止衆而止止得非想而
非非飲冰雪以年熟澡甘泉而色輝儻老生其
不死會移家而見依

嗤彪賦

有序

予羈巴丘南百拆山中有道士善檻虎兩函
桁之以鐵中不通也左關羊而開右以入虎
懸機下焉餓之抽其桁出其爪牙楔而鋸之
緼其舌已重餓之飼以十銖之肉而已久則
羸然弭然始飼以飯一杯菜一盂未嘗不食
也亦不復有一銖之肉矣以至童子皆得飼

之已而出諸囚都無雄心道士時與樸跌爲
戲因而賣與人守門以爲常率虎千錢大者
千五百錢初猶驚動馬牛後反見犬牛而驚
矣或時伸腰振首輒受呵叱已不復爾常置
庭中以娛賓月湏請道士診其口爪鐫剔擾
洗各有期道士死其業廢予獨嗤夫虎雄蟲
也貪羊而窮以至於斯辱也賦之

大何山中之一獸兮受猛質於西旻貌低團而
項廷鼻黝隆而齒齷目斜匡而電爍聲倨頷以
雷殷舌理粗而莖樹鬚鋒橫而獵人爪含銛而
卷曲尾拂彗而纏伸咤形模其足怖矧精威之
絕塵靜嘯而陰颺宰起坦步則稠林自分凜氣
候之相制隱形勢而見尊况百拆之深山常此
窟之成羣黃班屬而臥隴白頰連而飲津初涉

味於牛馬遂舐及於人民戶震躬而屏徙或重
遷而遠藩獨無生之道士故有心而與隣力不
加於子路術不詭於黃神布石關之宛轉交鐵
葉以續綸界鳴羊於接檻誘聞羶而見循進密
歷以窮路退躄躅而下門遂乃聊浪擲跌偪又
輪囷始傖耗而怒湧久牢騷而意煩氣屈而敲
力瘳而跋壙局拘而勢改積威約而理均於是

道士欣焉待旦及晨舉之於懸處餓之以兼旬
待威神之委頓任處置之紛紜未陷頭而拔鬚
先胷爪而剔蹠換權牙於巨斧磨刺舌以疏巾
香泔變其腸胃清水洗其喉唇欲次第而施食
已隨宜而致馴初猶啖以礎肉次則習以盤飧
或設以粃粒之餘或投以菘芥之根旣苦饑而
伏檻敢擇食以懟恩遂乃改山林之性氣狎鷄

犬之見聞遇夫人之下視卽弭耳而意親諒厓
柴之已去放野牧以逡巡非止柔性兼弱其肋
圓腰纖而脇息豔班摧而襞皴撫之而亦喜撲
之而不嗔似巨狸之擾足若卑犬之纏身偶循
隅而吐暗輒蒙呵而愴覓昔有大虫之號今有
小畜之云懊撐距之無時委降戢於非倫雖山
君之短智亦梁鶩之淺仁見其弱而可弄牽以

售而論斤有守犬其未足借虛名而守閤旣爪
牙之久折亦何威而見奔第周旋於苑薄得混
迹於冕磨學婆娑而昵主戲矍綽以娛賓感知
音之君子被嘆涕之殷勤偉茲靈之巨猛鬱有
武而有文偶唇吻之所及皆性命之相因論雄
心與剛力固決軋而倒坤畧網絳而風飛觸燖
燎以雷噴哮怒則千人自廢憤蹶而萬瓦猶震

非胥疏其有欲何牢檻之敢陳偶朶顧於跋羊
落一髮於千鈞饑窘來而餌施利器往而性泯
足人間之玩擾何氣決之可存諒如此而又生
固不如卽死之麒麟

玉茗堂全集

玉茗堂全集

臨川義仍湯顯祖著

賦

大司馬新城王公祖德賦

有序

夫原鴻者流滙柢厚者枝郁至乃河海配秩
乎三公風雲奕葉乎千祀明德必大有由來
矣濟南太僕少卿灤川王公祚自瑯琊徙于

新城祖有翁媪積施累行嘗獲偷兒哀遺梁
粟市有醜而負神責者神曰王翁來乃貫汝
已而信然精神之至也傳至公考起鄉貢士
爲穎川王傅公秉山立之資受庭誥之業幼
而靡恃加以食貧或歲無完衣日不再食愉
如也成童雋其鄉校弱冠貢于太學遂成進
士拜工部尚書郎呂梁著奠水之勤穎川表

息風之孝起復戶部權于九江誓如白水雅
以幣餘修飾學祀理餘鹽而末嘗塞上會計
而本政具大臣以爲材會虜大人 天子使
治兵雲中上谷時咸寧侯仇鸞新寵以數十
萬衆橫雲中脅治粟郎吏又與制府史公議
開馬市縻虜而邊人益騷鸞間襲虜敗欲殺
候者十數人自解而其裨至僞首功公爲請

折金粟半制虜闌入釋候卒而誅其裨鸞心
折焉上谷大雨水饑 天子詔卿貳往賑公
條上十二事行之拜金幣之賜者再兩鎮臬
兼校士拔相國太原王公大司馬代郡郝公
於童孺之年得一爲異况其加雙公之明也
邦之福也竟以忌者徙叅于黔適三殿災當
採木斯路而羿蠻阻兵千里道斷中外沮莫

爲計撫臣高以屬公公進者長蠻熟問故出
入虛實曰吾知之矣是爲鬼方縣歷幽曠大
兵四征之弗克殲殲之非衆數十萬三稔不
可乃潛授三將軍千人斷其忝集而身引死
士夜忝落洪畢登而呼火窮其巢蠻大驚愕
獸鬪者敗鳥竄者殪降其酋經理之羿蠻平
奏上畱公采木并功公嘆曰得以棟隆爲

天子堂何恨乃從匠石將吏擇木遐翳犯飛
毒吹蠱之虞極躋山絕沉之險固已無林不
臻有蒼斯息矣最後蠻乃獻其大木千章皆
懸崖躋石熟視而不可出衆咸憂之公齋心
路禱飛文于天天爲暴雨谿谷盡漲大木通
行浮于輿方而公亦以霧露之疾終矣訃奏
天子悲憐之曰某官其忠勤可憫其論祭一

壇三殿告成追贈太僕蓋公居恒尅柱自誓
赤心報國直道事人斯其效矣而厥配太淑
人劉實相以成益用忠勤爲母訓令子聞孫
節鉞簪紱至十數人施於曾孫多孝秀之士
淑人凡三受綸誥而服素紉刺老而不衰精
心慈氏好施予邑無丐者生辰偶作銅器變
爲樓閣峯巒世尊其上蓋念力也嗟夫公與

淑人不可作矣公卒以秋中月盈而旻淑人
逝以元夕火息而傳天地之正也公纔逾大
衍而淑人幾及百年憇其祖妣視茲蕃熾天
有所不足而陰助成歲功陰陽之奇也黔祠
家祐並額忠勤敬德音也公卿人士委積志
頌徵文獻也公孫司馬公視師黔蜀培勤襲
忠聿念厥祖謀有以傳徽遠久乃盡掇晉唐

法書雜寫其文夫太傅碎玉采就於興嗣內
史遺珠璣聯於聖教駢帖而三斯亦奇之至
矣千秋萬歲愛其書手其文愛其文思其人
如披蓮泊恍玉帶於西河若玩華趺指鳳凰
於東阜詩云孝子不匱永錫爾類司馬公之
謂矣小子欣其盛異願附不朽嗣西美之遺
音仰東王而敬賦

蓋聞表東海之灑溶配泰宗之峻極導濟必登
于王屋行河始大於積石故延陵致歎乎始基
遷史興言於累積曄毓族於天齊耿流風於畫
邑濟南代千秋之相琅琊振青州之急仕臨沂
而浸昌至始興而駿發太原未足爲競爽高平
何能爲逐末流泉揆星徙于新城東武世田何
之業不其傳樂浪之清饁留畬而邁種何翁媪

之樸淳授黃梁於夜竊甦酒負於明神食陰德
而未旣啟公侯於嗣人曰惟麟公作傳梁邱穎
水之清穆生之醴誕我罔卿克厲岐嶷感杯圈
而廢詩正衣襟而學禮高文以就角巾而起丁
歲領環橋之彥甲第映蘭臺之美治于呂梁實
惟都水度飛漕而悚經政覩懸沫而泳名理其
來其徐言過其里道穎川兮視藥阻洪河而風

厲泣顛天兮稽首倏澄波而訖濟迎釜養以盡
年撫琴聲而毀瘁起推擇於司農總軍儲而上
計清權笑於湓楚指江流而肅誓固孝子之潔
白豈盟言之所制備庠序之缺史飭陶周之悲
祀蓋體素而敦風匪緣雅以飾吏露風裁於鹽
筴屬雲中之有事出管籥以干城效情形於節
制居嚴王貴將之間屬金生粟死之際漏漢物

以紆虜攫僞俘而委罪微我公之亮節熾狂仇
之逆勢羽檄飛兮殉午公沉勇而先智第堅壁
而清野但傳旗而舉燧歲倚畫其功多嘆濃酬
於金幣旣標稜乎武奮亦簡駿於文揆拔將相
於倪齒繫材殊而日異徙鎮于宣滯雨愆年王
人恤師布詔宣恩十上機宜邊圯而全外和內
剛諧世寔難宜卽北兮建臺乃徙黔兮參藩迤

西之荒厥惟羿蠻緜于九絲叢螿濊滇釁景皇
以迨嘉每懸師而刈旃累士馬兮物故畧相當
兮振旋偶酋目之相仇擁黑白而爲難壘磨牙
于有截道暴恠而無烟儼三殿之經營當采木
乎是間中樞蹇采入之計司空屯梗出之言盈
庭嗟咨莫知所原厥撫廉公屬以事權公爲休
然周爰咨宣腹脊險夷翔實瑕堅旣洞其底亦

訊其言皇皇天朝蠻非敢然虞以稽誅乃酋寔
愆盡種而殲荆榛遠延少十萬師多四三年耳
不及掩踵不得旋時乎時乎用決而前密署材
官三分其千阨塞要關邀逋絕援渠閩周遭櫺
格緜聯公帥死士領之以語兵不在衆入穴得
子探彼洛洪期宿而至比昏環秣啣枚疾赴衆
謂公止公實儒吏公怒赫赫斬牲以示所向惟

予馬首是視偃旄攤鐸宵中其下進薄鹵附寂
無知者我公虓如周麾而呼鼓角翔飛燒其渠
胥光炎燿天誼殺震地歛爍貽愕卒起不意潰
決鋌忝東西角殪蠻乃大哭霆擊鷹鷲前負質
斧詣吏肉袒問所虜殺罪莫可殫曾自引服皮
面決眼約十償一下及畜產契箭齧舌誓不復
反羅拜乞命乃受其款爲定要束布示寬簡改

軍吏附我氓筦戎索旣靖夷歌斯滿豁落溪
峒發泄崖窾剪格疲絕有夷其坦累世之勤收
之旦晚宜卽黻繡用錫圭瓚帝詔竣工并緒而
纂公益感奮奔忝厥職束峽口而溝霧露皆土
人之絕跡水則沉槎而泳山則躑履而歷石林
虧蔽萑露瀼滴風魍木魅之所嘯語猛獸怒垂
之所脅息數瀕死而倂存委鯨瘠於匠墨夷爭

獻其異材顧沉吟于絕壁臨層淵兮飛湍眩砾
崖兮轉石殫人力其焉如會靈心于帝力走三
章以訊神雨萬壑而沸激神哉沛兮東馳踰數
舍兮一息夷庶譁其精靈公已廢其寢食瘴彌
連而不休豈出入而無疾在死法以猶劬謝刊
旅而長畢上訃奏兮哀傷下禮官其議卹調勤
勞兮以死遣爲壇而祭一殿三成兮允贈慟駿

骨兮罔秩黔之祠兮庇依棠勿剪兮芾密顏廟
貌以忠勤取懸書乎天日庶蘭菊兮終古無患
災兮長吉倪劉媛兮淑人塞佐忠而輔勤帥介
婦以整穆繼三姑而順均匹從王於婦道式正
內以嚴君泣未亡於杞梓禮如在於藻蘋依大
士而持念廣勝業而貲貧結純誠之影像偶鑄
器於生辰忽西方其變相美樓閣之峯雲異海

蜃之幻物豈躍冶而爲人證前生而寫印爲善
巧而現身萃福德以生男並端好以貽昆燁風
雲今起族罄海岱今揚芬重榮節於高閣疊桓
蒲於薦紳歲孝秀以無虛策賢良而必聞子無
之而不貴孫有象而卽文宿精輝於玄冑疑頭
角於曾孫綦綦者衆振振其倫閎閎蔭而成邑
羔雁擁以爲羣冠名家乎海內紱方來而是殷

益源洪於灤川執二語以龐純矢赤心以報國
必直道以事人德無回而配命開有先而降神
父教子以無二子貽孫而有仁矧遇其妣顯懿
于門示承考以時述勗念祖而彌諄撫南榮之
列桂比北堂而樹護誥五膺而薄浣壽九表而
示紉母猶績以謚敬子能恕而奉辛御戴勝兮
瞬首縈朱絲兮善隣祗姚江之翼翼庶羽接于

說說有忠烈之死事亦善聖之俛存憲文武乎
家邦衍忠孝於王臣諒文獻之斯在徒世祿而
何云儼司馬兮文孫誕纘戎而建勲淚黔江於
錦水弔潘輿於玉輪炳哀榮於丹冊赫寵綖之
皇綸碑表則崔巍張蔡歌頌則溶毓淵雲濡緇
素而恐裂勒石闕以虞皴岸夷山而變谷火卽
燧而傳薪遂乃目追有盡心笑無垠檢游龍于

寶晉拾墜翻於亡秦淮水發金碑之妙跡蘭亭
鋪羽爵於貞珉皆公家之舊觀糾雲漢於穹旻
前者慨不可作後者襍而誰甄惟梁散騎乃集
右軍暨于唐宗命彼懷仁事有瑣而足始法有
奇而可循矧祖德兮巍峩屬衆製兮繽紛籍筆
精其始遠減墨妙而成陳爰搜古法迺寫今文
蒨摘影綴蟬聯翩翩點畫波拂碎粲瑋璘方慶

効材於九葉信本呈妍於八分約褚虞之映帶
兼顏柳之亭勻智永失露橋之秘法善得雲麾
之寬擇吉光兮集翠總明璣兮備珍助流鴻而
取態盱駭矚而爭新將使臨觀者稽請而恐盡
展握者錯落而疑真嘆鑪錘之妙手信千古之
絕塵嗟夫太僕公之忠勤旣徽麻而映帛司馬
公之孝思可透紙而穿石蓋皆煥若于神明詎

止繹如於鈎勒昔衛孔父鼎彝稱先祖之美周
君牙旂常紀厥考之績彼皆昭明物而靡傳孰
與夫蒞寶書之無斁况夫察其天文知兩制之
矩模觀于人文見一代之制作將司馬授龍門
之策王氏世青箱之學紛琬琰兮齊光麗盤盂
兮永恪臨茲末簡賁于承學眷靈鏤於華趺佇
昆銘乎井絡仰燕翼以遙欽遡鴻麻而遠托

感宦籍賦

有序

今上丁酉三月予以平昌令上四年計如錢塘盪舟長日篋中故有高士傳慨然尋覽之無存也童子故以宦林全籍進予覽其書書官書名書地書號大若鱗角細若牛毛晰矣備矣反覆循玩亦可以奮孤宦之沉心窺時賢之能事感而賦之

有平昌之令尹淹結課以孤驕偶猶夷而懊悵暫循求於展披頗有仙班秘籙士品玄碑巾箱失檢記室忘携既宦林之有籍豈童子之無知因而取御業已忘疲嘆閱川而閱世何此書之可怡冠二京分列省之地戒標四季合匝歲之天時其地界也東綿遼掖西折涼雋北隄代薊南極滇黎控中軸于長安剖河山而四維皆百

戰之所取豈一目之可縻署都官於南北擬周
漢之東西南簡曹而少務北備家而多儀外則
邊遙其腹幹切其支臺省于焉受使州郡于焉
彌知有斗僻以孤鎮亦犬牙而交岐甫一逕以
維絕或三會而扼奇下至一尉一候險如三毫
三危有兼有特孰正孰裨莫不禹迹陟于周官
堯封攝乎漢威猶恨缺紀官于朶衛失請吏于

交夷其天時也選則通急之殊其候推則例閏
之譎其期秘館視三年之學內徵以四稔爲規
奏計侷優而或殿報政當過而或稽臥病者往
來於浹歲予寧者去往以彌朞或遲將而往返
或奄息之早遲第有聞其必鐫鮮存亡而闕疑
覘邸報之日積直會計而改爲是故日曆終歲
以猶把宦籍逾時而輒揮在近者摘新而賞實

市遠者豫舊以酬欺非春秋也筆削聖而竊取
非易也先後天而奉時時之爲義大矣惟名與
器隨之嗟夫大鈞寫物皇極鑄人物與無妄人
生有真吾有身而易寵世喪道而難貧是以羞
其編戶榮乎縉紳然而布種詭雜值候續綸幸
者乃爲公侯之子卿相之孫前書厥考有階有
勲後列環衛如官如恩托江河而猥大依日月

而常新不必學書學劍自然允武允文又若駙
馬都尉一體天人在旣富其何費獲至貴而無
勤次則納貲而爲郎亦以財而發身過此以往
其勤可知矣清流之跡奮以文詞則必沒身乎
藻綴噪吻于吟咿寒暑侵而靡覺骨肉怨而不
辭至如羽林隸策倉門學醫吏人讀律中書臨
池玄流理樂天文測機莫不窮年渴晷立骨銷

肌彼殆胡爲乎
或下月所用之又其甚者作
奸犯科知無不爲跂榮分僂迂平取奇皆欲爭
毫釐於此籍之上附咫尺於半部之餘外有乘
間抵巇能盡能綦微言解頤說劍說詩日者狎
客夜來秘師皆得遊大人以成名指芴流而借
貲下則緹騎惡子前魚弄兒一則如獬如豺一
則如韋如脂無足比數何所覬睨然而物有所

至事不可知買功爵于攫金之後乞告身于枕
袖之時經營衣錦踐躡綦絲在主爵而無斬咤
剖劖以何遺第云爲之則是敢曰文不在茲嗟
夫天下亦大矣仕人亦夥矣有鳳凰之官則必
有騏馭之使有金玉之英則必有糞上之士巨
海葺龍蚌以鋪文太華總松榛而擾翠散之人
有十等合之天無二日天其平也不平人則不

一也而一不平謂何有一有多有終身于帝所
有絕望于廊阿有十年而不調有一月而累加
有微歆而輒振有一蹶而永蹉有弱冠而崢嶸
有白首而婆娑有受萬金而無譏有拾片羽而
爲瑕有擁旃于華羨有投牒于荒厓有提鹺而
擬方伯有守郡而無建牙有贍僮客而鳴豫有
絕父母而勞歌有長孫曾而襲珪有鬻子女而

還家有上壽而賜尊有自經于幽遐麗風者衍
言笑而加翼絕津者罄號咷而靡槎得時者隨
俯仰而皆妙失志者任語嘿以無佳徒使墨守
者視此書而失攄捷鬪者指是刻以嚴誇智愚
勇怯于斯乎盡銳貧富侈嗇于是乎交賒細則
鑽如蚊蝻大則據若蛟鼉緩則穆如塤箎急則
慘若鉞邪親屬之榮悴以此人身之軒輊匪他

何必者舊傳而特筆人物志以編摩第登名於
仕版若陟巘以盈科有規有矩如琢如磨諒有
朝其必市想無臣而不波乃有揚休山立遽戚
駘駘姓名舛詭爵地參差鸞視重其一粒豹覺
颺以隨窠苟有懷而未暝總奔命於旁羅是故
謁選則咳成雷雨議汰則委若泥沙地貴則聯
之以雲錦命賤則等之以風花至消詳亦品列

益撫卷而增嗟名理疇而贗售功勤埒而盜夸
等奇節而抑真並文林而采華然則茲籍也蓋
有朱紫異質淄澠同和者矣迨其甚也且有人
焉巧若窮奇昧若渾敦名可以冠楚杌貌足以
鑄神奸物論之所必去茲籍之所獨存方災水
而未已或閱季而彌尊亦有行若處子智若耆
舊望足以壓折非是才足以替獻可否謂周行

其必先視百爾而豈後比索名于右方復展轉
而烏有或置無人之境或寄冗從之藪冷之以
所必灰瘴之惟恐不忝彼拙效其常然豈削籍
之所朽徒使頑弱之人覽茲籍也耀其貴如得
如驚黯其賤如失如玷懲死灰之不然慕積薪
之所占名已沒其焉如貴及生而可艷捐亢壯
以和顏笑幽憂而委念然則茲籍也能使人采

色飛舉道心沉亂可觸手而偶觀難淹神而久
玩忽掩卷而罔然吾亦多言之爲幻矣

竒喜賦

有序

庚陽丁右武天下英竒士也與余同庚而生
庚而舉四十年中慷慨連綿備極兄弟婚姻
之好懷忠踐義爲嘽嗜所危不盡其用閒情
壯志斯亦已矣有子元禮叔兼弱冠上下並

積風霞之氣騰藻繡之文謂可咫尺雲天承
考賓王發越未盡三年之內溘其萎而知者
爲之酸心行路爲之隕涕惟兄與嫂叫號頓
跌摧隕咽絕如不欲生親懿咸相勸譬叔兼
幸有遺腹無宜過傷雪涕強食而需之男也
爲一解顏而咲至于七日又殤天道如何人
生至此仰視棟宇曾無容旭之光俛睇堦庭

莫解繁霜之氣忽而神人見夢曰叔兼有子
在某所可往取之起而診諸保阿則信有焉
叔兼有媵最近而娠去之民間兩月而生子
男民以爲貴家種收之且一歲而餘矣促駕
携以歸並其所遺姊坐褌褥上衆睨之姊弟
相向儼然叔兼也兄與嫂氏舞躍大叫歡絕
如絕復蘇如斷復連擇吉告廟錫以嘉名見

之宗黨右武馳書示喜且曰孤兒生處備極
艱苦此天賜也相國張公而下薦紳文學遞
爲詩歌嘆未曾有題曰國香家寶志夢蘭階
玉之遭也余謂此蓋人生殊喜驚恠奇特者
矣鋪而賦之

肇玄黃之泮渙激變化而璇璣哀慘舒於凍燠
糝夷實于山川動亂儀兮鍾應呬蠶絲兮酒泉

鳥啣子於寄生菟搖絲於茯苓物有所不可致
理有所不能詮謂變盈其偶爾亦與善而良然
洪都右武實余友兄襲司馬之高門發鷹揚之
緒英並撫塵而振采偕弱冠以成名步揚休而
山立吐玉振而金聲筋骨備五行之色胸懷深
四海之情固將以忠爲福本信爲順禎司馬之
門再啓公侯之後必盈何悟天不其然玄之又

玄世不我恤日以一日積羣蜚而去朝懷幽憂
而滿室激昂臯壤之間消瑟文尊之匹攬年髮
其已遷撫陔庭而借一趨庭惟何匪凌匪夸伯
也顧哲叔也豐華蒼筤竿其秀竦珣琪珥其交
加藻機雲于鸞鷲寫徽獻于蛟蛇伯艱難于厥
考叔依回而在家伯能操世法之幹叔能修學
士之葩被奇服而高冠顏渥丹而映霞談家難

兮感慨撫世態兮咨嗟見其二子曰予叔父靡
襟期而不親在微詞而必悟嘆吾兄之有子鬱
堂構乎終路如何如何天乎孔多阮我兮如不
我克促我兮如不我苛香雙劔於委土迫兩龍
於逝波喟瑱錡其已爾遑顧望於其他堂幃恨
兮潰絕行路涕兮滂沱凜華宇之將及與凌陰
而少和伯兮已矣叔也遺腹庶其在茲七日不

復慟余嫂其何如兄展轉而增觸悲有助兮號
呼愛無詞兮勸勗沉劍兮望遺彩而何收逝龍
兮候纖雲而靡矚惟庶季以長年或多孫而羨
續忽焉天開叔兮有孩色于室而棄路取諸寄
而置懷生之行葦之際立之藁翠之階儼睟周
而有餘視髦儀而靡垂並遺姝兮笑語均秀額
而竒顛本閨房之兆叶費門戶之推排佚蘭蓀

於媚草洩桂種於流芰蘭汎瀾兮思公子桂幽
穆兮畱上才虹晦明於抵鵲之璞月虧全于去
珥之胎壁間道而始返珠離浦而再回乃公得
之而驚曰異矣傾都聞之而喜曰幸哉雖人理
之多制亦造物之倣詭震鬯失而索男跽趾傾
而得子碩果懸而解剝娣袂歸而濟否字逢集
於上楹識仲孺於遺體祖抱孫兮顧咲孫遇妣

兮徙倚覺痛定而逾痛驟喜來其亦喜夜遽明
而豈厲決復入以成汜荔側挺而見珍桐孤生
而韻美引一髮於千鈞立嘉名而正始擬圭璋
之判合薦潢潦之原委重承饕而挹注續悲墳
以携取免牛羊於踐巷佐螽斯而在宇如天福
其亢宗寔帝詒乎下女托江河而猥大恃神明
以無苦長葛藟之綿綿接庚陽于鼻祖

終

玉茗堂全集

臨川義仍湯顯祖著

賦

四靈山賦

有序

大憲甌陵李伯東使君余齊年中莫逆昆弟
也宣慈惠和篤誠明允擬跡循聲率本忠孝
尊人百雀先生隱永春萬歲山中賦詩引醇

歡然難老矣而時于母夫人有棄緯復禮之
感一日歔歔涕流語余不孝所差慙乃得佳
城艮坤幽妥淑臯耳記言龜龍麟鳳四靈形
家本天文星氣指象方隅石精妄意良然亦
未能具而有也吾母隴岡殆具是矣先是飛
來峰神見夢示其方中起行四山旁薄歛霍
拊蒼麟儀朱鳳趾角冠距誠然畢肖獨鳳味

微琢而趾孤峙心危之居人云石鳳嘗飲于
田田人琢之如石馬然其趾蹠如嘗苦海風
喋吸微徙就視有之構大士座支其危向後
地數震莫能動也其壩爲石龜鋪如蹲龜者
磊珏相望有雙柱起盤石中如執珪謁帝小
子請于大人曰可書四靈于豐岳矣弟芬疑
之曰三靈則有如龍何予曰槩山爲龍奚恡

而不四然終莫爲噉也循行轉深忽見一石
屏大字二十餘皴蘇殊半洗發讀之爲蘇家
書云此山形如出洞龍一草一石皆其鱗角
爪甲幸勿剪伐以永山靈予驚喜甚從大人
昆弟饁而觀之曰此非龍耶乃大書四靈于
穹窿之石望若天際云已乃凌步飛來得唐
歐陽詹大書古雷字震爲雷爲龍此非龍起

處與爲書起龍字字大如四靈形家若四靈
備者得無異耶又言山起東粵過大營石龜
而來甌陵屏護殊衆其山其水是也溪流九
十九并折而襟其後珍木靈果森蔚無計翠
氣霽雲于樹頭甘液成津于果下此亦淑靈
之樂丘而賤子之永廬矣幸爲賦之時若瞻
望焉余按形家龜若龍世爲公或二千石乃

至有四天文四禽之中爲黃龍母垣而封子
孫其逢喜極爲賦用附貞石

若夫山川始合玄黃旣分爰在天而象物卽下
地以成文酌十形而取貌准七宿以扶輪首蒼
螭于大角味赤鳳于飛鶉處玄冥而伏龜矯素
商而現麟偉精氣之攸屬寔宅兆之所尊顧機
緣其詎偶率影象以難論有之者備詭而不必

備備之者确瘠而不必純畏飛龍之壓角喜遊
龜之顧蹲麟啣觸而何貴雀和鳴而見珍彼氣
雄雄兮畢吐繁精磊磊兮竒臻是故地以大閩
爲大天以溫陵而溫旁唐鬱積塊軋璊璘殆峻
發于我友伯東君太夫人之阡也我有世父百
雀老人天倪其偕母氏維陳翁延和于萬歲毋
息照于三辰翁命伯東卜吉而墳連山歸藏負

良揖坤審止氣之在茲覺中央其有神庶三吉
兮是取詎四靈之敢言日月居諸雨露沾濡撰
杖屨以攸往攝織佩而亦趨翁指盼兮矍矍子
顧步以踟躕目擊心語光駭色殊伯東喟焉啟
其大人曰母恭人之阡美矣備矣四靈既矣懿
斑麟兮何獲定三五而磊隗緬嶙峋乎睇視恍
庸觚兮特尾兆聖母以縈絲受火土之嘉祉委

石麟而載毓衍隆厚於公子右有之兮左宜涉
百步兮有咫翹鳳髻之峩峩載盤陀而托趾立
數尺于千圍根厚地而無底眩五采兮丹碧被
蔦蘿之霍靡宛形色兮飛動噦奉萋而戾止夫
何啜于稻梁儷神馬而志詭疑秀躋之蹌跟托
孤撐于慈氏非善巧之過虞經海翥而微徙挺
龕柱于來茲月數震而無圯瞰丹穴之隣比稱

鸞訛而鳳靡隕酈石兮將雛峴鸞鴛兮鍾美若
乃吉氣有餘黑整于陬積以委迤十丈而哀上
有跋龜大如一樓吐息嘉林法象靈丘紐于左
方以名其郵昂首公倉觀頤何求濡尾潘湖流
泉美疇乃有十倍其嶠見于隴頭上隆下貞晞
陽伏幽偃蹇壇場顧子而留儷石磐輿青雲上
浮有若朝天玄圭載侯青純蒼光背可刻鏤伯

東稽首定墨向尊而謀曰大人宜書四靈以祥
千秋仲熙獻疑三靈示休龍則何居請眎其繇
伯東嘿然以夷以躄忽阡左之葱菁見大書乎
石屏曰洞龍之出爲山之形鱗甲指爪片石咸
星告勿采伐以壽其靈名旣寶於眉山字如書
於滁亭盱鬼神其護持曠日月而丹青伯東驚
喜幾不自制父子昆弟載酒往視昔疑今信四

靈畢至曷維其同亦祗以異曰時乎時不志曷
俟書徑六尺鐫于巔巔臨觀道上若懸天際烟
後人之摘抉實先天其布置蓋惟隴岡之原起
于粵東石龜而南飛來其峰聳平疇而插漢啟
山靈而告中行周昔刊於古雷伯氏再標以起
龍豈雷古而龍今將龍起而雷從點乾象於霏
微接震畫於崆嶲其爲字也行若龍矯立若鳳

峙展若麟遊促若龜曳爲隴岡兮發色與飛來
兮爭勢曄有子其若斯向經文而武緯允陟踐
於樞機且時陳於臬事眷白華而達漸洳綸綍
而泉賁母孝而慈彤管是紀事大姑如其姑撫
猶子如其子闡明淑以追榮方幽贊而未已况
其數曲之間顧珥凌閩百里之內殊麗輻輳羅
松帶其左覺海鏡其右鴻漸高鳩翔其前葵朋

青紫屏其後高則紫帽清源平則大輪三秀擁
龜龍於潮汐障鳳麟於郊藪琨溪百而堂會珍
木千而厦覆五色之雲恒飛六氣之霞時逗翁
顧而咲曰淑人之丘子仰而喜曰慈姥之阜亦
安測夫天垂象而彌布地愛寶而逾剖如岡陵
兮貴徵歷世孳兮氣候不敏顯祖世睦之後於
母猶子伯東則友勒頌樂石敬附不朽頌曰

四守在天下屬爲物河洛之榮龜龍自出生祖
之洲麟鳳是窟孰配孰啻此焉葱鬱有真有精
非其彷彿夫人委翟中殞若月地以爲媿藏其
真骨回還四顧光景發越如麟翔郊如龍竦闕
如鳳振冠如龜杼笏千百其障踴躍旁勃趨于
甌海湧自炎粵千里相牽束脉毫髮小頓大起
莫不生活重坤負艮如在房闥含章載貞吉止

祥發煌煌石窠受天綸紵於赫顯懿氣莫可闕
子之翼之翰墨黼黻古雷起龍四靈是揭星流
霧洗光怪旁達世未嘗有奇茂斯括溶溶大山
揆示毫末顯祖作頌次于玄碣以告千祀敬共
無忽

霞美山賦

有序

蓋余歲丁未夏五得拜蘇弘家使君于大憲

之府休暇論交遊得何君稚孝蔡君敬夫李
君叔玄叔玄固余同年友也三君世清真士
而使君懷抱之內瑋博淵靚貞方淑明誠足
相友海上相與謳歛大篇北山南陔之恩油
如也已而曰賦者古詩之流子善爲賦吾母
黃淑人卽安于武榮之霞美山山朝暮出雲
五采燁昱婉孌甚美吾雖宦遊意未嘗不在

淑靈霞美之側也子其賦之以識吾目因示
以山圖壙志志封公仲齋先生筆也山鬼故
爲君魯大父直軒公冢公嘗途遘重器不取
天畀佳城焉公之子爲御史封公其孫爲御
史觀察次仲齋先生也先生孝篤不忘追養
維謹歲時偕淑人祠墓下登降徘徊久之嘆
曰美哉斯丘與淑人獲托體侍先公幸矣兆

而舍之時引稚孝顏範卿黃郡伯諸名儔薰
然酣歌其中覺烟霞爲氣質身世爲風景趙
臺卿陶元亮之流也所志淑人內行純備綸
誥總以孝敬儉勤四德德之大與顯祖仰承
孝則謹按丹青金石之重爲使君語鋪而韻
之匪敢掇冢賦之小文要以望岷瞻之極思
焉爾

懿神明之俶紀始司寇之蘇公配周邵而則遠
長國家而祚鴻肆層瀾之淦淦叅奕葉之龍龍
豈翅乎東海高駟馬之門平陵受九世之策文
言引慶於積善春秋占達於明德周秦蜀閩如
緘及紳集賢之雅屆我蘇君清明在躬宣哲惟
人豈培塿兮松柏必巖岳以風雲竊燕閒而問
思遡鴻休而有云大祖直軒內恕以仁芥千金

于路遺寶寸心而席珍樹德滋而保世嗜欲先
而降神遂開我祖施于曾孫家伯憲伯家君隱
君若我隱君子之爲行也趨庭學詩而學禮居
室中慮而中倫出昭明而處晉偃經綸而遇屯
旣光乎德亦富以文承考兄其芑美據鍾釜而
食貧載矩矱兮揆覽次芳菲兮襲紉祗令德以
惟孝感人生而在勤誰其佐旃我母維賢誕黃

公之著姓兆金紫於神詮視必徵於厯史步必
倣于蘋蘩痛先姑之靡逮觸衿佩以洗瀾承繼
姑之卞急調氣色以盤旋奉堂上於枌榆再終
星而始捐我祖垂堂倚杖而顛母也倉皇披帷
出援此血傳藥沾衣涕漣翁曰孝哉曷爲其然
子以學遊嬾備除涓豈無青衣必躬必虔溥雨
于庖上漏下泉背腹兩兒齒屐而前斫蟹炊葵

拏梁擊鮮堂戶清芳施于賓筵議其酒食製其
裳衣箴管在佩繫袞周資免乳多難織結澣治
縲車夜鳴分燈課兒受四喪其畢舉咸取襄於
嬾儀踴總幃兮諸孤泣嘗蒸兮歲時其勤孝也
如此惟神明其知之幸襲余於三爵表庭誥兮
閨慈應神言於金紫存恩華於翟禕絕灑溢以
明冲隨黽勉而彌施在邦媛以貽則沒隣春而

助悲時守鄴都計奏言歸袞儉勤與孝敬捧王
言而載馳擬賜金其上壽豈杯圈以長揮痛奔
星兮靡及將毋諗兮何期惟我舊山厥名霞美
隱君子之所營曾大父之所啟其爲山也鬱兮
坤盤聳兮天構福全屏其前紫帽冠其後翁山
八赤睨其左清源三能映其右葵峰依九日之
華梅嶼醞雙陽之秀江縈綬于金鷄飲風湍乎

鳳珠豈金崎之自來拓靈海而安受蓋我隱君
載瞻王父之藏而嘆曰樂哉丘也優貞士於霞
屺肅幽人於雲竇乃挹恭慈言升其阜葱蒨展
簇於屏帷氤氳吐納其懷袖指岡巒之體勢儼
冠佩于列宿水繹耀以來衿謚層阿而遶雷傾
焉雲徊歛焉霞覆出乎空闔炫乎玄岫駭神靈
兮光怪絢葱蘢兮氣候丹山明兮赤城輝步盼

嚮兮兩迤逗翁語恭人霞美且悅顧九原其在
茲庶千秋兮共穴恭人謂翁信美成說托餘臆
於先公願前驅而秉芻翁有感焉乃壇乃宮菱
舍其壩陶焉在中撰歸行于一際藐旦夜之玄
同樹松柏于齋隅唱露晞于朋從意爲歡兮偶
爾寧嬰憂兮我躬蓋翁達于未嘗有生之始母
當夫所必不免之終歸大衍兮成數痛靡依兮

先露諒終吉以偕臧就初貞而撫路匪暨陽之
近渚微京洛之遠遡大地靡虞於漏泄兼山允
呈於顧濩接止氣于西南眷前霞之曉暮細若
金碧之吐蠹如樓閣之曙麗訛鸞之宵緲屬雌
龍以容與氣有赤兮有青態若迎而若佇覺先
慈之樂康奉家嚴之指厝依祖德以延休叶孫
謀其永固悵來歸而咏吧賚思成於寫素嗟夫

使君之言若此何孝德之綢繆偉封公兮任達
偕同隱而啟疇寤玄闥以通明處便房而燭幽
嘆祿衣兮不復拊霞御兮長留諒徽音其不朽
托悲頌於靈丘頌曰

連山起兮似城郭堠陵嶢兮肥不薄赤氣揚兮
曳朱鳥赤氣鬱兮抱蒼璧霞之美兮青以赤代
殊好兮貫華脉齒寫吟思麗以則照耀山容動

海色楸梧離支女貞柏菱舍陰煙美營魄太公
時遊鏗樂石過祖及妣醉賓客咲語恭靈此依
息乃公壽筭永無極

浮梁縣新作講堂賦

有序

饒陽浮梁有講堂焉隆然兩溪之上合大易
麗澤之義基宋南渡營于元季前後廉訪之
使兵燬迨于茲聞周侯新之甫成而以能治

劇徙南昌湖錢侯嗣之益嚴以烟友人黃君
龍光謂余曰講院發氣色于流峙備體勢于
規隨于以居賢來章邇所未有盛美不宜無
以照炤于後敬爲賦之

邇名流於滙澤陪德鎮於匡垠匪江湖之氣急
緊農桑之業勤俗劬勞而憂善地偏安而樂貧
鄉老提朝夕之塾遊童遵出入之倫國游藏於

經解家韞席於儒珍道山東其證聖里江西而
近仁凡茲宦遊適若期契莫不欣其風土安其
氣味引諸生以怡懌法講堂而蔽芾相慕用以
良然有代興而靡廢若夫芝城浮梁通乎大鄣
處江山之清絕入吳楚之空窠人喜儒而化鄙
吏好學而明臧乃至勝國之長餘燼之良猶能
嘆青衿之道缺感棗棗之味長慨焉始基逮彼

搶攘近華風而狄遠在門墻而雅亡喜孔顏之
像在覲皇明之道昌皇道明兮孔昌熾萬曆斯
兮卜年世聲明燁兮文物沸牛女精兮江海溼
物有沉而俶暉事有龐而載懿有溪有堂孰揆
孰嗣我聞周侯經營其位祠亭翼翼橋閣跂跂
中田有廬以教以食六月南徙物有其備我湖
錢侯崇增厥制繚以墉援飾以欄綴徒觀其四

達之爲勢也北起乎覆鍾之山西揖乎鳴琴之
治東陂池而折北道如帶以迤迤遶三方乎曲
隅面長風于水際兩岡相啣捷以木石中有歸
塘樹以荷蒨延演漫汗煥炫寔歷收委潤於閭
祁度霓梁而振掖隱玉几以橫陳拔蒼岑乎遠
碧鏡晏暝而寫旭暉晡煙而吐魄風霆雲漢之
所迴澗沚蘋蘋之所滌白鷺飛而有容潛龍見

而時惕對學海以津梁宛天成其泮壁山陽兮
峻崒振衣兮下視邈靚秀于洲衢逖喧器於闕
市右爲堂兮友仁歛烟敞而巨麗義有取乎燕
居鬱嘉客之所戾友仁之左徑以葱青傑閣倪
天是日尊經靈峰在前寶積在後其朝迴溪其
夕孔阜若登山而魯小似酌海而星覆典則斯
有闕佚是購豈禪枝靜閣之藏廼孔林曲阜之

言統一真以定尊積數仞而云富噫喜此堂美
好備矣四方之遊日其暨矣今夫浮梁之茗聞
于天下惟清惟馨係其揉者浮梁之瓷瑩于水
玉亦係其鈞火候是足然則無清英之意者不
可以及遠鮮陰陽之力者不可以致用故夫通
人學士坐進此道鑿戶墉以爲室則思其人以
居之觀埏埴以爲器則思其人以儀之必且撰

杖履儕衣冠診同文發更端舉聞見而歷落依
性命以盤桓珠無燧而不引響有叩而必還蓋
將以映發于天人之際流通乎師友之間濟濟
祁祁便便反反課規程而測美執文句以攻堅
講太極而中隱賞良知而物捐是皆擬日用於
仁智轉天機於釋玄等疑虛而借實鮮遺邊而
遇全體用合而理正粗妙函而事安惟尊經而

正業得在意以酬詮慨學人之多致攝堂奧以
良難有同聲而響隔有殊風而意傳嘿則神而
有信辨且存而勿論將樂群兮攻玉豈譁衆以
連環或風以零或遊于觀度楹以几適館而殮
式飲食兮庶幾亦歌舞兮咲言則必助流雅頌
之化肄廣中和之篇佇孔容而徙倚矚周道以
迴旋載濯于溪乃挹其源紫莖屏風紋紆以漣

茵蔯始華被以秋蘭幽香杳靄清華嬋娟度懷
虛而會遠足抱素以明蠲若夫燕息橋梁之上
光陰魚鳥之前見漁樵之莞爾覺士女之悠然
君子既愛其日小人亦愛其年悔聞道兮不早
返端居兮景賢賦陳其志歌末其言歌曰
惟芝以東是曰浮梁龍棲鳳遊絃歌在堂廣毘
學宮波陰壘陽經閣峩峩振衣相望有源有都

視其歸塘汝穀以貽好學無荒中有新田外有
長薌迺作于茲休其烈光令以慈湖訓以紫陽
汝父汝師來遊來康莫美爲報崇經重道道有
隆夷性無粗妙尚有典刑惟忠惟孝雍雍者祠
有槐有柳桃李蘭蓮春秋戶牖其西崇功其東
惠後侯其來巡載笑飲酒我歌不忘貞于孔阜

玉茗堂全集

玉茗堂全集

臨川義仍湯顯祖著

賦

懷恩念賦

有序

永春李伯東岳伯吾舉進士第齊年弟兄也
都下一再往反別去予補南沉寂竄廢闕奉
音徽者殆二十餘年天與伯東來憲江省一

見驩甚周旋拯接備極綢繆伯東天性忠孝
人也忠也故素絲大車著司直之節孝也故
南陔北山極遑將之味茲且以再上計行遷
次欲歸侍百鶴翁萬歲山中奉再驥以何期
拊寸心而淚下懷人念路將何以處我乎技
一涕而賦之

惟馮生今有倫亦淡成兮鮮類始違家而涉朝

宗辭榮而罹晦憫聚散於來朋感實虛於前士
有緩急而與鼎孰涼溫而可嗣矧齊年其乍進
幾淹時兮容曳輒分署於吳朔旋乘流於嶺滋
奉周旋而未再曠音形兮莫繼靡塵露之淺益
乏蓬麻之薄寄林壑擠而迥幽蒿艾委而重蔽
積五稔以無見俟千秋兮末喟何伯東之大雅
儼簪黻而來暨乍握手以驚癯每投心而念瘁

動引想於淪落數解噴於煩憤向慨亮而多節
復醇深而疊致秉素絲以爲絨集幽蘭而倚佩
大憲執而風流清价人藩而斗維會總三英之
正則兼六藝之能事入周秦而澹墨出晉唐之
新意懸日月乎壯觀佇風雲於遠勢文綽兮而
有斐德熏然其旣醉發梗槩乎家乘托綢繆於
世契匪華朋之振衰友迺良兄之瞻弱弟羨人

之均調仰天性之獨至外比則樞機周慎內
行則經緯醇備本緣親而報主式資孝以移忠
拱百鶴於雲漢懷萬歲於山中寄裁斑乎繡黼
謠陟岵於呼嵩矢浮雲而愛日凜巖命之無從
有季代慈烏之弄多孫撫羣鷺之雍欣釜鍾之
逮及咏皇澤以從容戒荏苒兮懷私勉驅馳兮
在公翁言則然兄豈其同暫跪喏於遙旨長鬱

咄於深衷寤遑將以明發感煩瘖而蘊隆豈杖
屨之無人洗厠袒而匪躬待六年之奏計庶我
歸其自東嘆自東兮零雨眷西人兮秋暮雲晶
熒而黯色風寥落而商素江氣肅而生波岳色
悽而響樹念無衣兮此時送公袞兮上路我有
心兮誰與言我有悲兮誰與寤或留處於君王
或追隨於世父急忠孝於茲行肯爲予兮延佇

思舊恩兮擗結隔阡陌兮誰度送賤軀以何其
反章門而匪故祗加食兮增歎詎裁書而減慕
庶徼天兮惠來望踟躇兮淚橫心而不能去

高致賦

有序

夫崇高以富貴爲大聖人以有位爲寶英賢
所以極至死之節常人所以集資生之具皆
是物也豈顧問哉然而時有所不可致道有

所不可期常情嗾嗾通人妙士委時順道屈
申其情樂則行憂則違確乎其不可拔者進
退之象也天下士宦江以西而睽於予者江
東姜仲文稍爲中人所疑破手作大機宜文
字以去壯矣嗣若海寧查君晉江蘇君前後
以引疾行皆君子也予高其風而惜之曾幾
何時而蕭山來任卿復引年解岳伯政行矣

初與予言去意於西樓予謂丈夫會合卽有
餘齒未足爲吝任卿容骨脩炯有神時方以
吏事清嚴見重未有厭意驟以引年爲禮何
其腐也任卿欷然曰吾嘗得小石印款以腐
儒吾之爲腐也久矣腐儒得宦至老方岳甚
幸意本不家於官所以久此亦欲有所致而
不可則取一歲俸日食百錢劣可十年而盡

過更啻之兒子輩無與吾事也因言海山花
木之勝欲及耳目聰明時行弄之家臨元人
九歌啻細甚時一摩莎問湘君何神已而嘆
曰豫生國士之言豈不信哉復誦風人數章
而起曰不死期湯生於華嶺之上耳予恢然
聽之頗不爲異秋而果然望匡廬道于越而
歸大吏更止之不能得夫人才悶悶然無所

于我江于行河久于梁濮轉餉初于秦蘭皆積
小以致大每遜易而就難菱舍移而江漢遙軒
帷敞而歲月殫軼分陰之炯炯抱寸意之閒閒
春酒夕佳興言其端若登高而悵遠欲車急而
馬煩勉以遷延勗以旬藩人綱服其警策風物
資其折樊匪龍枯而淵夷甫鷹揚而天翻公顧
我兮則唉謂予言之寔艱玩榮期之妙語愁襁

裸於憂患有多才而僵死或盛年而立乾微予
倖於清時容直木之高蟠嘗片巒而已知况屠
門兮飫餐覩一葉而自見矧蕙苑兮爲管喻吾
子以物理百難盈而易慳火盡薪其欲傳石懸
雷而見鑽漸忽微而得老徒黽勉以施顏事已
隣于尾遯情何吝于闕觀諒所至而不貪遲風
波其未還數掾之側十畝之間雜蒔花卉周施

栢闌護西州之海棠接東人之牡丹山北指兮
西陵水南滙兮東關凡越王百戰之履綦皆幽
人一曲之考槃及耳目之精熒付尊足之蹶跚
興緣欣而屢徙景方延而詎蘭茶笋無虧糧藥
粗安有子不貧亡妻曰鰥唉張蒼之飲乳耻文
淵之據鞍旣鍾漏兮並盡何金石之足刊計杪
秋而一決姑與子兮盤桓十月之交菊露猶團

竟果所言飄然挂冠納文書于大府捐印綬于
通班出南浦兮吹洞簫揖西山兮辭鷓鴣鸞情無
之而息遣理有存而絕攀俸三百其早逋路九
十而恣拚寫樵風於歸楫指越鱸於餘盤爰暢
意於江楚恨闕遊於匡山將振策乎五老之巖
維舟於落星之灣倚九疊之屏風看天池之雪
湍飛灑發皇躊躇闌珊浩歌而西終焉伏檀諒

莫黑兮匪烏豈予庭而有貍拾圖章於漢汜分
腐儒之汗漫發沉騷於素色手名迹而未殷何
世人之逖逖尚好少而卽頑撫國士以何期偉
豫子之所嘆傷嚴陵之沫彩涉萼湘之淺瀾快
老客之還故鄉劇廉賈之去市闕道山陰而折
屐際海曲以循環鑑夙姿於湖藻吸餘芬於亭
蘭書禹穴而登窺琴蕭然而坐彈存有涯于自

已擲無盡於人寰庶良朋兮惠來得寤言之所
寬嗟乎任卿何歷落而多懷吐緒風之激亮苦
素絲而弗渝甘白首其何望釋荏苒而志悅酬
耿介而色悵凜霜霰兮交下煦山澤兮神王肅
支許之前衢屬予心之所向采真氣乎天姥瀑
靈襟於鴈蕩慨心知其幾何及吾子之無恙緲
孤光兮浙湄記成言於江上

酬心賦

有序

癸未春予舉進士經房秀水几軒沈師年少
于予心神迫清而予方木強故無柔曼之骨
五月館試房舉各得上其門士時馮君夢禎
謂沈師曰子門中固無愈湯生者耶師曰固
也恨生骨相涼薄不如徐聞鄧生生甫終賈
之年而負河岳之相必大拜者其人也予聞

斯言服師人鑒分以一縣自隱得少進爲郎
便足無敢更攀師門重累知已偶曠宴侍師
喟然曰以子之才齒至而獲一第何也凡人
有心進退而已然觀吾子之色若進若退當
何處心耶予卒卒謝起作酬心賦答之

若夫吾師者鍾玉名家簪綸秀緒環耀魄以中
激軼蒸林而上侶日月漾其清華山川鬱其風

雨故宜朗穎獨耀鮮雯稚舉勝衣藹艷於蘭庭
弱冠影徙乎桂嶼遂乃清勇皇軒高華帝園皎
陪飛月之纓匡飾受河之奎度冲影若文霧之
霏霄叩微言象冷風之穆羽故允以標九河之
人宗藻十洲之衆父邈廻薄躬實命不逢少多
竒阨夙慕玄同抉目英雄之記銷心文學之蹤
安步險聊泥之轄卑棲危碣石之宮紅泉近構

紫蓋遙通浮霜剪桂漬月捫松琴樽薄展糧藥
粗供顛辭舜帽耳謝堯鍾笑鳳衰於啞婦嘆狼
跋於僂公金盃不問人間之占芝泥竹簡
忘情家世之封而大人有言吾子可仕旣人生
之在三亦大戒之有二爾乃暫釋虛恬稍窺華
潤曾聆拾紫之言輒著拜經之論响嘯北海之
僊藏陽翟東方之秘殉山川雲氣之墳姓名風

物之訓十五代之今古從羲三十國之春秋主
晉靡不恣南宮之極遊歷東觀之名俊炯發越
於明眉度逶迤於玄鬢終以風氣適上性韻剛
疎薄泓噌之寡醞病披昌之詬儒固以愔心理
簫軒眉文轡世率駭於真龍士或驚其累鷲命
與年迴理隨形闕瘦旻月之珠泉晦無霜之玉
地遂乃悵寄兼深形響多制大屐而比三公險

衣而遊一世分東吳之孝廉老北門之賢士不
謂人師相逢此時撫乾璣而發采握地鏡以窺
儀引三吳之勝氣暢百粵之高姿亦盱衡於薄
質時撫節於蕪辭遂使路寢皇人備影形容之
相鈴巒都護齊吮芳媚之嬉自謂可以擢殿堂
之雅步起金碧之沉思茲焉已矣抑又何其苟
墨絲其有寄豈州縣之無竒東平之士風可愛

中牟之穉子無欺河陽之花城足態柴棗之蘭
徑兼資未當速貧猶旋泛局張華王佐感巨細
於鷓鴣賈誼竒才嘆園方於鴻鵠天損有餘人
苦不足乍勉身而就列卽回情而舍旃定君躁
於流品落賓名於世筌窈窕兮順紫靈之氣依
棲兮保玄仗之年此時吾師者方當調神王瑄
篤俗金提贊蜚耳與長目覆孺齒與修眉弟子

于焉歌謠庶幾想風雲於竹素指星月於彛旂
入玉出金輒見麒麟之畫小鍾大鼓長聞鳳鳥
之徽詎懷私於隱屏末駐運於洪丕

于官止郎
吏沈師鄧

生久
逝矣

哀偉朋賦 有序

昔人友朋之義取諸同心夢簞簧者得賢友絕
琴者傷知音其致然矣予年未弱冠有友二

人鍾陵饒伯宗崙臨川周無懷宗鎬皆奇士
也崙長不盡九尺瘠而青瞻視行步有異鎬
長不盡三尺髯而甚口當予譚說有致崙笑
斷然鎬笑軒然三人嵯峩蹶跚而行乎道中
旁無人也崙父廢莪公於豐城李大司馬燧
鎬於鍾陵張大司馬臬南昌劉都督顯皆中
表少長其家故習譚帝王大畧所喜皆大臣

將相籌策占候之事而崙復曉夜誦書常與
予映雪月交書而盡乃已同臥處三歲餘前
後別去至同赴南宮試都下臥未嘗有異衾
枕履襪先起者卽是不知其誰也崙同舉進
士出理順德有潔清公忠之名三察並關將
吏凡却萬金徵試御史病告卒于臨清汰舟
于姑孰予在南祠望江濱而哭之曰傷哉伯

宗君親友之望未塞而遽爾乎鎬久爲諸生
以文字不倫落去益學騎射兵法年四十走
長安以策干陳御史大夫炘不受說譚大司
馬綸綸陰用其策而陽棄其身鎬發憤恚懣
歸而病目幾瞑飲後婦乳復視貧甚發嘗所
受異人書作黃金不就苦饑則學辟穀然不
可久時來就予食予爲收教其子仲兒壯慧

而死益自傷慨然有長遊不反之志或諷止
之則曰重華祖龍皆客死何必我旣而謂予
曰我數夢之帝所終當仙去公不甚信我我
所有異書兵訣長以與崙後崙死而鎬書散
亂盡所與卧起信宿掀髯長嘆者又獨予一
人而已辛卯秋裁六十來送予嶺南握手而
唏曰伯宗與予獨一子皆不好讀父書無能

言其父者卽從此長別子能忘言于故友乎
予悵然止之曰勉飯自怡長生固人所爲也
去大梅之南夜夢鎬來告別指伯宗之舊館
曰鎬其如是矣予驚而晤曰有是耶起而發
燭跣佇爲賦而哀之

惟吾朋之恢詭形一短而一長並弓裘於北渚
同研席於文昌無懷之胸腑有竒伯宗之體貌

殊方予參差以中立亘通衢而頡頏服御無分
於几髡詩書或亂於巾箱夜談則風雨如晦曉
起而月出之光有擊目而成笑無疑情之見妨
歲周旋於金午予獨舉而賓王暫成器以不括
有善刀而未嘗饒損趣于文園周搖心于武場
時不可兮驟得年有徂而莫當計摧殘於生慮
精勞傷於死喪周食素而瘞黑饒衣單而瘠黃

予公車其亦窘時黽勉以傾囊影答形其有待
力問命以誰強怨鎬君之需往吝喜崙生之蹇
來章一司刑而縻爵一無權而食漿矢貧交其
不遺館無懷於奉常爲料理其糧藥并資營其
劍裝期上書而赴闕圖方畧而詣羗足屢踈而
恣遊目半盲而競張諒意智之有餘悲年命之
無疆乍彈冠而縱語忽投書而若忘喟短籌於

世局寄長想於仙方道佳期於沙城之宅指神
物於星子之傍作黃金以飲器步青鋒而吐鏗
吸流華兮再中畢雄心其未央嘆斯情之浩渺
感高興之淋浪恒度世而苦饑持氣術以休糧
閱九州兮何求反山中兮樂康夫何山川未改
歲月猶常昔伯宗之慷慨被雄職以還鄉料婚
葬之完立起王事而方剛豈知時有所不可待

計有所不可詳清淵有計隕我惟良予在陵祠
驚投于床司業劉生叫絕于堂形無死法云何
不臧睂目豎而準隆頰額修而骨昂笑有醺而
微韻步無遽而不莊惟股掌之平薄與情興之
滄涼極予交而晚疎在他人其缺望然猶重子
以平生之矜矯屬子以世業之匡襄昔獲交於
予美羣吠恠而搶攘庶子名之修立見予懷之

淑芳詎想夫有繡衣之半載無珥筆之毫芒君
親之恩莫報友人之責何償逮輜飛而靡及豈
魂愧以他翔遡江波而洒淚重頓擗以頽礪原
盍簪而挺解海方舟而起戕彼先醒其已然予
後死以誰相爲汝半暮兮素帶三旬兮縞裳遇
同官而見哂慨朋友之禮亡越卯辛之夏五予
復上書而遠行途瘴熱以丞厥歸奇病於三陽

問所苦而舌吐夢易宅以魂褻辛淹秋其再起
將有事于炎荒周跼蹐而送遠軫彌留而自傷
悔辭家之不早遺枯腊以踉蹌書散敗而不收
名湮微而孰章撫予心其尉遣泣回袂於河梁
九日登予于盱姥十月適予于滇陽忽周君兮
見夢儼顏髯之秀蒼指伯宗之舊居望白雲而
歌商嗚呼已矣其二其亡牙絕絃於鍾子惠滅

質於蒙莊俯濠魚而奚樂聽流波而望洋皆一
子以偏露並繼室之罹霜號蕭蕭於殞木哀闐
闐於壞墻周無隣以相杵饒有弟而綏筐諒無
貲以協睦雖有哭而悠颺饒五喪其未舉周一
坏而矩央指越裝其可損寫泉幽其再光獨恠
夫熒熒司命曹曹彼蒼或千指而逾瞻此數口
而靡遑氓蚩蚩而長在士琅琅而遽殃玩此時

之芻狗皆昔日之干將豈古帝謂之縣解將造
物收其不祥鎬夜行而在燭崙晝歸而不暘等
悠悠於市合何噉噉於歸藏虞舜在而猶羶秦
皇死而不香何帝鄉之滅没卽人代以荒唐續
無纖其標擗車有素而徊徨委魂緒於虛微起
編歌而自觴撫夙衾以何得竟愁思之不可量

玉茗堂全集

玉茗堂全集

臨川義仍湯顯祖著

賦

豫章攬秀樓賦

有序

江南洪州藩司之樓紫薇是居東維攬秀西
儷辯章晷漏存焉仰答天桴昏旦之候無爽
俯和民紀旬宣之政有序厥由來矣屬乃赤

燦示舊靈仰告新革不日而已乎鼎有時而
傾否岳伯嘉禾陸公四明王公相與謀曰休
哉功有半而可倍事有一而得三斯樓之設
時夜是司顧以吾屬宣懷未乏羊杜賓至燕
言或假僑札爰有沙城神僊之路遠在數里
滕閣帝子之洲近隔重關非期使人難以下
夜微寧就此一臺之基增爲三成之制咫尺

足以鬯體尋常可以發志出不嫌於久次進
無妨於設險利用大作莫便乎是者上下僉
同時物會貞賦取幣餘役以流傭令信工敏
浹月而就剖斲並舉重複奏緻楣極蜿壇軒
牕玲瓏麗素而不露其材髹堊而不傷其質
都作告備司時練吉二公相與攝英寮從妙
屬帥而登焉則見山川畢升天日加朗出草

樹於綦履度魚鳥於几席南浦西山不在關
城之外矣徘徊流觀則朱邸華閨環珥于府
寺英耆貴俊冠蓋于達巷以至都人琇厲之
觀方外玄緇之處偉雅神麗指顧而詳漁唱
田歌夾重湖之表裏軍漕估舶沸瀕江之上
下孰非宇宙之精氣國家之利寶乎嗟夫事
有合而成賁物有大而可觀我勞如何煌霞

取日用之適有客蒞止風雨惟時至之期至
于鼓角晴飛戾天霄而益爽壺尊夕轉遲月
露以方盈節之以陽陰文之以禮樂不其懿
與樓成而中丞衛公適來撫我益新其政恢
軍國之容復隍臺之制模觀精偉神色異昔
樓增麗而勝焉歲戊之申月日之九陸公偕
岳伯四明丁公永春李公觴予此樓晝漏之

聞連於晡下夜鳥之咽通乎晨戒澄日氣於
煙霏寫月精於露靄固已極斐亶之妍譚盡
淋漓之雅致矣總而攬之秀其外者山川備
仁知之所樂秀其中者人物兼富教之所歎
儻于霄有異之氣恒存薄收無憂之言每驗
則諸公取適於來旬吾屬從歡於上日益亦
太平之盛事宜長久而無極乎彼夫城隅之

宴忘其喪亂歆臺之什夸乎霸餘方今洪淑
吾無取焉諸公粲然而咲曰然則子爲我賦
之一言均賦敢居王子之先九日登高辱在
大夫之後云爾

若夫圖書上計之省樞璇布政之宮蕃北宸而
拱峻劃南夏以成雄正經途於一軌極高閎而
有融金城遶雷工允西玉漏欂梁而震東取陽

陰而定體亦登降而不中制豈懸於飾樸時有
適於污隆象除舊而布新事有約而助洪政自
公而燕喜禮賓遊而會通勝寄攢羅於一舉意
匠圖回於再重允規隨而命作叶和會而勸功
引章貢之壤材集臨汝之精工乃作高門爰及
遺塊土緣剝而厚下木層升而致美下如甕以
穹窿上若堂其瑰瑋墜碱懸施繩斲兼倚蠹以

九挺鋪以密砥重欒承而窈窕枝穿複以玲瓏
乍井幹而宿斗倏丹艸以流虹納靈曦於陽馬
閣玄溜於陰蟲庶歡呼而勿亟公賞成於具逢
擁官聯而上陞立嶒岷而正容恍靈區兮湧地
迫慶霄兮麗空蠱有事而後大革取新而不窮
地響奮而盱豫天際翔而上豐准燥濕以維則
度几筵而載容睇刻漏於蓮花叶信晷於祥風

寅亮者資其察貞觀者賴其同謹戶牖而知時
倒衣裳而在公且三爵以興言會羣龍之高盼
承交臂以宣劬暢遠心而釋倦仍攬秀以楸危
臨辯章而聳絢諒所攬之多秀豈吳餘而楚羨
判休明於昔今豁懷袖於聞見方外內其具賞
期齊晦而兼善紛繆悞以孤遊被溫冲之餘眷
遲九日兮晞令期佇三山兮登薄軀沙城出谷

其將晚滕閣扶櫺而未舒竟夜飲其厭厭儼新
構之渠渠清酒溢而山光凝纖歌揚而潛思紆
時則籟稍沉於風律節懸瑩于霜鍾雲晶暉其
歛色露溥腓而向濃霧翠川而晻晻日罩野以
隴隴沙含虛於近趾灌吟寒於遠峰歷倒茄而
去燕遵反宇以來鴻援山中兮桂枝渺江上之
芙蓉迫年衢之冉冉曠天宇之溶溶蕩芳英於

蘭苑懷幽人於菊叢陶頽然於刺史嘉率爾於
桓公折萸房而醕醴警蕭辰而切衷坐紛想於
遊極起延竚於巖櫳像長雲之蜿輻若飛雨之
空濛躡前榮而恣觀良鬱鬱以葱葱鬱葱兮直
下西山兮若畫測地象於神州輒金方其欵跨
上都隱屏於太行中土開靈於少華彼拔地以
常然此瀕江而潤化噉迴隍於淑渚出清都之

臺榭影四序以恒流氣千年而不謝江則括坤
爲墟委乾爲畔淙淙潼潼浩浩泫泫出沒逖沱
縱橫泮渙繹絡乎東溟之盡灑瀨乎南紀之半
川魑水夷之所盤嘯海錯天琛之所流灌晦冥
而風雲變黓澹蕩而星河炫煥洞窅眇以無倪
愜虛明之所玩流玩兮蒼郊筠之山兮以超矯
迴風于丹陵上留田而逍遙睥青峰于梅葛指

緱氏於巖椒白雲英其嶮飛碧海堆而嶼搖認
落花於桃崦訝沉書於石橋乃有紫清懸瀑斗
絕而起喂若秦人秀若蕭史天寶開而霞曙雲
蓋移而煙靡崑膏玉以明球岡流珠而覆米灑
泉壇于冠石度松門于屏几蓋西山之高二千
其咫西山之延四百其里雖發地而厭原默匡
廬之徙委滄山帶以披衣遡屏風而疊綺輪茵

接香鑪之雲瀍液下清溢之水勢遠而危鬱肆

嵯嶮虧夕陽於半江宿初月於層崖映松楸而
氣美漬嵐霏而色滋日射則陰霞委金雨過而

生煙拂

明涓而翠寫風增瀾而緝灑江女

窺而變

綃織而巖戶移白鳥光颺於壁

嶂舟人影

沉暉逝菁熒其可悅動冲溶而

倍姿擁名城正都極敞顯之南戒穎陰雄成

于漢首武陽式廓于江外水竇按龜而潛洩岡
勢鑿龍而抗會湟洫艤艫而布遠樓觀儲胥而
備大比志物以維屏恃休明而勿壞動迴颺而
佇想步循環於衿帶故其內眄則東西湖水漭
沆日月鶴池之煙霧猶鮮龍門之風雨自出長
橋度以殷雷鎖院開而辯蜺束二溇於淞函渙
大明於濟碣水花淨而香遠風色迥而態溢率

長士以思瞿必都人而秀發時泛客於三洲唱
凌波而未闕遶百花兮霞滙約九津兮雲泄綠
淥漉以周洄記斗門之約節宜遶樓以西逝迺
負關而東決散眊章而脉清會宮亭而勢折卷
八郡之風濤立二孤於喉咽信東南之都會備
西北之門闕豈太真之議編將昇元之氣歇大
中潛而龍起建炎噓而鳳瞥自中迤西官方所

治巍峩約繹文樞武毘建中臺之龍節設行馬
以驄麾旣鼎立而置參亦岳峙而分司受官成
之統總裁氣脉之機宜大府承而望縣翼壇祠
蒼而庠序徽物色音華之所蒞止明謨風愛之
所棲遲訓恪則宵嚴於析署務閑而晝偃於鈴
扉通溝轉減經衢緯陌參差流離朱邸有赫啟
北維寧載南而國委滕嬰於歌吹帶劉宗之盤

石怵華山兮采銅欵扶疎兮屬籍席芬英乎獻
靖跨文明於淮益屬宗師而綺正收茂才而路
闢被儒素以矜華朗慧滋而秀奕時節物以斯
游儵國風而咏適罷聞樂之層歛食衣稅之舊
德扶輿中央精華裔皇山液而流川暉而翔貴
相上將公卿丞郎或橋梓而槐棘或塤箎而圭
璋駢緋夾綦嗣鼎承筐偶必大而無降交累懿

而益詳典則獨藏於堊國風徽時映於公行必
百世而猶祀在式微而亦張故老敦詩成童誦
章道述門素經營國常七族奄而魯阜八姓彩
而吳襄冠事業於本朝襲俎豆於其鄉月旦重
於汝潁科目兼乎顏商里聚星與通德藹喬木
而相望餘則所至而煙火萬家所向而雲樹千
牕或望止以如歸代謠作而無囉至乃郭塵表

裏百物流物輳估客之風期淡章門於廣潤縑
精奇乎萬里舶魚鱗於重鎮槃展成而授序紛
駢擊而沸震貨如臺兮累榻寶若星兮流暈炯
琲珥以彌出孰規鏗而見吝步旗亭以稽詣夥
闌干而售俊敵物力之膏華識山淵之美蘊固
頑艷之共在取資生而適韻然猶貴不粥於周
度賤難得於老訓稟方岳之理靜忘關賦之徵

峻市無擾以無虞賈亦廉而亦信民日中而自
退士三倍而無近却服御於天邪劭康功於田
峻惟江之壩厥田十千雖水耕而火耨職善坊
而固泉懸種陸於歲秒視黍稷於昏前怙寬鄉
而償瘠趾樂郊而趣先適斯樓之倚徙厥高眺
于天田原隰素而夷衍滕臯繡而邈綿澹如雲
之漠漠計井牧以無愆望杏花兮輕弱訊冷風

兮陌阡意民天而遠想豈煙景之留連若乃湖
圩宕迭五百餘里黃荆白沙松蒲柏子柘葉長
玲桃花淺水爍蓮芡於蒲稗唼鷺鳧於鰓鯉列
漁步之攸界繫澤梁之所坻風鮮景明煙消水
平鷺鳴榔其如織鼓釣絲而互經拂顛翎於旅
鴈襍漁唱於高鶯晝炊燼乎樵舍夕弭柂於吳
城喜多魚而獻公佐涼酌於軒楹逗滄洲兮歲

晚莞江潭而獨醒對時物於嘉魚咏聖風於有
杞則有逢掖深衣園橋方履顛顛祈祈雍雍濟
濟或翱于庠或吟于里容服旣則周行有禮尊
悅皇風瞻趨素齒披文采友來會於此摘秀升
之章句析孝文之經史鏤道祖於圖緯紬次宗
於玄旨若顯若覲或哦或倚企飛棖而逸想循
伏檻以流思汰塵滓而空清引芳妍而緼滋類

矯指而角鮮寔交頭其取師江山有興文之助
風雲爲接武之資龍門自天揭彼雲隱鹿鳴于
莘宴我薇司駭樓中之撰結成世表之威儀江
湖瀕而猥大豫章拱而見奇皆我公之攬擷獻
王書而載馳厥有學道之侶高隱之倫慕澹臺
之友教絜三百以爲羣處孺子之式閤倚一木
而自珍來遊來歌載言載欣仰吳會兮傾言子

俯滄浪兮弔蘇君豈風流之遂遠緬容與於青
雲世何流而不波路有方而必塵章之門兮塵
芾章之流兮波逝毓元命於江湖擘開神而演
秘蛟宮啟靈巍乎真君沙城表識多乎聖人搏
雲仞於西峰結飛客於南津撫城闕以逾故展
空明而互新吹笙之臺掩藹文簫之宅煙氲側
控鶴之玄景挹寫韻之清神緲仙尉兮難卽揆

丹華而散霞睽伶崖兮有覲響天樂以鳴真庶
仙人於樓居故延庚而挹辛西山之陽不死之
鄉西山之陰無生之林渡江之青竒特遠谿之
笑清越西江之水無盡南岳之風有鬱下雲居
而振幡過上藍而拄拂聖諦冥兮體常露凡情
盡兮境超忽坐盤中兮何事講虛空兮何物相
與詫黃龍於山中笑丹露於木末喚斐休乎斷

際點葦丹於靈徹樓觀等而平視誼寂泯而何
設領玄釋於簪俎玩今風而古轍誕江陽之俶
詭常寄言而設端曩神明之鱗萃今巖岫之空
寒諒獨往之能事洵絕地之匪難乍遊陟以成
趣岌人寰而詎安閔吾流兮閱世蹇川途而獨
詣南上瀨以忘疲朔通津而必暨樓艦分風而
轉颿繞鼓接韻而浮吹路入達以如絲坐交衢

而委轡疇四方之都雅極宦遊之體勢公應接
以餘閒客周諮而有寄或雅歌兮投壺試清倡
兮舉袂足登高而送遠具成歡而旣醉乃至放
臣淚國遷客思鄉赴建康而不果適交筦而未
行亦有賢士失志遊子迷方覩遷謝而多悲感
留滯而自傷一登樓而慷慨異宣寫於毫芒客
也無勤聽我勞音會計之司成賦是欽日至而

鍾石斯起歲獻而漕艘載歆絕控引以無期灌
天淵而在今則有允士煩於星渚撞檣廣於山
林流粟羨於沙礫籌策高於崖峯鰲枕取於魚
鳥邪許殷乎笳音旗幟撓於荆吳謹囂徹乎睥
陰見軍國之有衍慨塗泥之所任戒驕譁於水
次妥積廡於潢潏時我公之約飾往聽矚以廻
臨喟民膏於庶土悚國賦之惟金延少內以涓

煩屬都官而獻斟終古有稻梁之色刑民無醉
飽之心鼓摻發而念遠棹歌齊而思深思深兮
太息倒景兮西夕秋志激而彌亮風候紹而無
射柅流華於末光動寒姿于暝色紛下馳兮燿
闕浮傾霞晦兮禽啁啾感授衣兮謝歡燠炳華
燭兮重登遊進匏瓜而更酌承湖海之下流悵
涼天兮北河遺佳人兮南州月微波而灑席風

析木以宜秋發浮樽於漸臺進河鼓於宵籌絕
天潢之閣道奉紫薇而披廓宛衡殷其在南正
杓樛於龍角轄左右之煌煌輔帝車而軌若偶
少府於關梁躡天堦而用作步飛光兮意折想
壯武於豐城何千年之寶氣得斯人而夜明河
魁載西形如戴匡津梁在中號曰文昌王臨川
而集計愧余生之草鄉草木落而自出風雲興

物具而加精官列盛而彌莊偉我諸公有濟其
郁衛公撫茲益斐其藁漢流聲于次公唐宣風
乎九齡陶姑熟之大志顧太康之廉貞耿河南
之槩亮王新建之虛靈九臯來而憲重三原至
而賦輕讞决爽鳩於林鷄文學猗蘭于蔡清並
師濟而休嘉各勤施而茂祉郡榻奮平輿之節
邑絃奉道州之理廻秀色於干旄鬯惠氛於蘭

醴雲無覆而不卿露有灑而必旨南斗之熒不
入西郊之霖自灑出明月于海昏萸枯章于郡
邸武寧希夏雪之零新吳斷玄穀之秕麥窺閭
而岐秀稻旅生而再薺洲野牧而不收戶肥并
而有醜女遵行以綢直叟遊詠而都偉孳秀盛
以恭承起歡娛而伏膺會大往其何極輦方來
而載寧善諸公兮有作慶徵生兮樂成蔭層覆

之耽耽對清佩之盈盈景斜延於夕佳趣遙攝
於秋屏巨煩燎而下盡興澄歆而上征商颺卷
而戶洞暗河低而坐傾悟挈壺之戒曉憬通鑿
而遲明樂燕胥其匪報激高歌乎列星歌曰
山巉巖兮江逶迤結飛樓兮含翠微雨陽貞兮
流音徽鼓淵淵兮漏遲遲宣明政兮發嘉德宜
登臨兮受光色來清觴兮眷今昔江南西兮秀

無極

